

孝

經

內

外

傳

# 序

今上以孝治天下德教所及近自公卿大夫士  
下至委巷小民遠極海隅日出罔弗感發  
天良嚮慕風化雖唐虞中天之治成周太  
和之氣無以加茲而猶

綸音特發刊刻孝經衍義

恩賜羣臣頒行天下俾家絃而戶誦之典綦  
隆也夫子曰晉武在春秋行在孝經尊嚴  
義備是孝經一書久與春秋并重天壤矣  
吾黨稽古之士其可不身體力行守前經

而遵

聖訓哉憶余總角時與 李雲山先生同硯  
席共起居其人敦厚溫潤口無擇言身無  
擇行氣識過人已遠及長非策蹇齊安郎  
同舟鄂渚時講論孝友根柢之學故交最

久情最切歲甲子予忝提楚闡戊辰入中  
秘畱滯京華與先生隔別累載每自故鄉  
來者輒問訊近狀知授徒於白泉雁臺間  
日以所著孝經內外傳相勗勉其及門高  
足悉循謹端雅望而知爲胡公門人也予

聞而欣慕以不得早讀其書爲憾乙未之  
夏先生長君石臺謁選都門出所傳孝經  
屬序以十餘年心慕之書得之一旦驚喜  
展讀因嘆先生實能身體力行故垂訓後  
學於無窮而詒謀孫子之深且遠也夫堯

之親睦九族舜之克諧蒸乂暨禹湯文武  
周公之已事千古帝王卿相本身率物莫  
不奉孝爲至德要道他如曾仲閔高而後  
孝子順孫歷世皆有惜其嘉言懿行散在  
羣書未能合一先生乃特分著內外傳譬

諸合翠裝裘貫珠成串坐帝王士庶之孝  
子於一堂卽彙上下古今之言行爲兩序  
可以備尚友之資可以爲省身之要讀是  
傳者孝順之心有不勃然感油然而生者乎  
其裨益人心曷有旣哉在先生入以教家



出以授徒亦猶行聖人之志何容心也乃  
太上感應不爽累黍今者石臺一發出人  
頭地方從聞詩聞禮之餘行其立人達人  
之志資父事君移孝作忠寔爲先生善教  
所基異日功名事業悉本此傳推而行之

易易耳然則石臺之言卽先生之言石臺  
之行卽先生之行謂非流光餘慶之明驗  
乎石臺繼述有志行當謀諸剖劖余知此  
書一出不惟上佐

九重教孝之聖心亦終當與聖經賢傳藏諸石

渠天祿矣是爲序

康熙五十四年歲在乙未夏五月

賜進士通議大夫內閣學士兼禮部侍郎

欽差祭告

女媧氏

商湯王陵寢監賞山西全省綠旗兵丁前都

察院左僉都御史通政使司左右通政太

僕寺少卿通政使司右叅議提督山西學

院翰林院侍讀侍講詹事府右春坊右贊

善翰林院檢討丙子科山東正主考纂修

鄒序

三朝國史翰林院庶吉士年家眷同學弟鄒士

璉拜撰



# 序

六經皆聖人躬行心得推之以治天下國家者也學不本於經則爲詞章餽飭治不本於經則爲功利權謀惟孝經爲尼山所特作貫乎詩書易禮樂春秋之精意雖嘗口述而不作其作孝經意以補前聖所欲

言而未盡使知文行忠信之教莫不根柢  
綱維乎此他日曾氏之子聞一貫微旨其  
卽所謂至德要道也歟夫參之獲罪於父  
誤剗爪根其事至細彈棊而解憂受杖而  
負慝與夔夔齋慄何異然猶見拒者三責  
以弗能如舜之豫親於道參自是益勉於

孝避席親承之下有經以傳後而孝之義  
發揮始暢極於天明地察光四海通神明  
皆由庸近而至高遠帝王匹夫莫之能易  
也我

皇上以孝治天下聖性天成薄海內外罔不和  
氣蒸翔余同年 李君石臺宰豫章之南



康民服其廉明士親其德教三年政成因  
出其

贈公年伯孝經內外傳一帙付之梓余受  
而讀之內傳則通乎教孝之言五經諸子  
古文皆備焉外傳以志古之行孝者虞夏  
商周之聖人下逮漢唐元明雖大小不一

而孝子之名必錄焉其間箋釋詳明攷証  
宏博有關於世教人心至切近深遠矣

先生身雖未顯而積慶於後賢藹乎忠信  
慈惠念不忘親按吏治者閱是書卽當求  
忠於孝佇効譽謬對揚

殿陛呈諸

乙覽庸非致君立身之符驗哉余適奉

命視學西江每勤訪幽逸舉盱水宋孝子黃

覺經建坊表之特祀鄉賢惜不爲先生

所見附於外傳反復雒誦而喜石臺能

以其傳家者公諸世也爲弁言於簡端

康熙五十九年歲在庚子九月提督江西

全省學政翰林院檢討加三級年眷姪梁  
南王思訓頓首拜誤

定庵先生輯孝經內外傳其內傳引經史諸  
儒之言外傳雜引史傳事寔附於經凡五卷  
蓋六藝之文皆傳先王之教於後世易詩書  
禮樂春秋所以明道德之指歸者其言博其  
事繁而其總會在於孝經鄭氏所謂恐道離  
散作孝經以總會之是已孝經之爲教也兼

天子諸侯卿大夫士庶人五等之品其爲倫  
也在父子而君臣兄弟夫婦朋友之道無不  
該其爲德曰愛敬而知仁聖義中和之體無  
不周其爲道曰民行而上下神明萬事萬物  
之理無不貫故曰天之經也地之義也先王  
之至德要道也古昔盛時治教休明五孝之

用通乎貴賤故人皆知反其本源推之於其所終極而萬化之所出王道之所成皆準諸此世之衰也綱維不立於上習俗不作於下聖人以身示之曰行在尋經欲人知所本源而反身切已守先王之教以立萬世之準其道未之易焉初古文孝經出河間顏芝其後

長孫氏江翁后蒼翼奉張禹以及孔安國劉  
向鄭康成皇侃邢昺等無慮百餘家然不過  
分析章句箋疏文義而已我

世祖章皇帝聖德聿新孝治懋建

特命廷臣纂修孝經倣宋儒真德秀大學衍義  
之例逮我



皇上克承先志

御極二十九年

欽定孝經衍義百卷始獲告成文義精詳理蘊  
弘博非士民所能仰窺萬一者矣援神契云  
士孝曰究究者以明審爲義 定庵先生於  
職士也所輯內外傳以之明審

欽定衍義總會乎易詩書禮樂春秋之指歸遠  
以發明宣聖之傳近以揚厲

聖教之緒弘敷萬化贊勳王道其裨於名教者  
豈其微哉 先生姓李諱之素楚黃之麻城  
人梓成而請序者其令子 石臺也以丙戌  
進士宰南康有治行果無愧立身揚名之道

云

康熙六十年辛丑歲仲夏月中浣

賜同進士出身翰林院庶吉士鄰治年家弟馮

詠嶺首拜撰

孝經內外傳序

昔夫子嘗有言曰行在孝經由斯言也以夫子之大聖而其行乃囊括於此一書則凡百行萬善千言萬語無非孝行之支流孝經之註脚耳孟子謂堯舜之道孝弟而已矣不益可互相證明哉孝經自秦火後為河間穎是

所藏厥後傳註不下數百家而其書多無可  
攷今所存者惟孔安國鄭康成及唐明皇三  
家然皆隨經文敷衍言理而未徵事未能使  
讀之者感發激昂歌泣而不能自己猶以為  
天壤間缺事也 楚黃李定菴年祖以碩德  
宿學久授生徒其教人以孝為本以孝經為

宗而又博極群書蒐羅甚富上自唐虞三代  
下迄元明凡孝子之嘉言實行一一採輯分  
為內外二傳若干卷內傳所載格言固可以  
垂訓百世至外傳所錄古孝子生平事跡其  
間有純行有奇節雖不必盡出於中庸要其  
血性丹誠鬼神可泣異類可格自皆不可得

而磨滅也先生聚古今來孝子於一書之中  
醞釀元氣薈萃懿嫻豈特表章之功偉乎蓋  
人之至性啟焉者或無所感于往事而亦自  
呈其天真下此則不能無假於見聞以生其  
感發激昂之致今得先生是書浸淫貫通令  
人時歌時泣不失天良是真可以教孝矣今

聖天子德極大孝遠邁隆古首以孝治天下而制  
科取士兼設孝經然則先生是書不惟能體  
吾夫子行在孝經之意而大有所闡揚而於  
國家教化之道其所裨益夫豈細哉今秋余  
奉

使入粵道出南康 石臺年伯出一編授余曰不



揣鄙陋綴數言於簡端以告天下凡為人子  
者亦以見八年伯繼志述事之大孝為不可  
及也已

康熙庚子仲冬上巳海鹽年春晚生俞鴻圖

頓首拜撰

南康李石臺大令梓其尊公定庵先生孝經內外傳成授余一編讀竟爲之整襟而興曰世謂作者難而未知述者尤不易也先生所著家塾警言以及玉田寶藏雲湖諸集俱關聖道人心久已家傳戶誦茲編乃教授生徒時所輯首列正文次羅行事證以經史百家之言而又獨運匠心集腋成裘殆不知硯幾穿而帚幾絕矣其自序云童子入俗未深去道不遠思有以變化其氣質吾於此知先生學問深純蓋得蒙以養正之心傳使當日出爲世用其功業文章不知居何等矣乃以明經終

老未克展其懷抱不亦深可惜也哉雖然羣隲者身後之浮名而著述寔不朽之盛業今大令提南宮宰百里五載於茲其得之庭訓見諸設施者亦難枚舉卽如某某身列士林而兄弟參商某某家本世胄而父子乖離至於詰訟公庭大令則摘取傳中一二條以勸諭之終歸歡釋此皆余所目睹者今則風移俗易莫不以孝弟力田爲務駸駸乎太和之象爲近古焉異日者大令考最登朝以此書獻之當寧頌之春官公之海內是先生能取千古人之書集爲一已之書大令則以一已之

書散爲天下人之書於以翼聖道正人心厥功詎不偉  
歟卽以爲先生非述也作也亦無不可新安後學吳雯

炯拜跋

嘗謂人子之孝於親也有本之天性者有得之學問者  
本之天性者雖慈父不能傳之子得之學問者兄弟可  
以相勉勵師友可以相勸戒甚之悖逆無知之徒懿範  
當前亦可相觀而化也故經史百家無一書無言孝之  
文而孝經又特爲古今教孝之全書昔人謂讀孝經一  
卷即可立身治國此意自隋唐而後知之者鮮矣己亥  
仲夏御自嶺南至蓉江 明府李石臺先生挽留署中  
居有間授以

太先生所輯孝經內外傳一書御每焚香莊誦未嘗不

汗流浹背而淚漚漚下也蓋御二齡喪母戊子先嚴見  
背計飽食煖衣於膝下者二十四年曾不知孝養爲何  
事況今十載不歸春禴秋嘗祭禮闕然天壤間恐無此  
罪人也自念此固天性之薄實亦不學之過嚮使御得  
早讀此書十年雖甚饑寒困苦寧肯捨吾父吾母之墳  
柩而遠遊他鄉耶今見明府治邑如家愛民如子悉  
遵

太先生之庭訓而仍原本於孝經內外傳一書康邑斯  
民獨何幸哉由此推之御又知此書出而天下之人子

皆不爲金鑑恐未能私爲李氏之球圖矣

皆

康熙庚子初夏關中後學王御政頓首拜識

余自丙午春迄今更十秋凡三歷西席所教授皆童子也童子者情獨切於孺慕愛未分於妻子是無言之孝余中心藏之矣昔醫間先生最喜教童子謂其入俗未深而去道不遠余亦云然今童子漸長余恐天性不足恃而思以學問變化其氣質然不得長者一言終無徵不信程知庵先生宦歸林下余每接其緒論言言皆龜鑑而大旨惟以不離乎孝者近是一日先生謂余曰孝道甚大古人之言孝行孝者甚多惜乎散見於羣書而未端立一傳吾每欲傳之以示後學而無如精神倦於



筆硯何余曰吾忝爲弟子師而敢以後學煩先生哉於是乎竊取先生之意本孝經而內外傳之內傳採孝子之嘉言外傳採孝子之實行合正文凡六卷閱二載而成質之知庵知庵欣然曰是可以梓矣子其圖之或曰孩提皆知孝何必讀書余曰不然孩提之時少不孩提之時多秦之俗豈盡如賈誼所言父假耄鉏子有德色婦姑不相說則反脣而相稽歟亦其焚書之過乎或曰孝顧力行何如耳不在多言余曰是矣但言之不明則行之亦不篤昔陳元失愛於慈母苟非仇覽與之講大

偷竊至性以相感悟陳元未必卒爲孝子或曰孝分內事也不可言功余曰孝雖不爲功但凡罪或可逭而不孝之罪無可逃樹欲靜而風不寧子欲養而親不逮此丘吾子之所以自溺也罪乎功乎或又曰孝門內瑣節也弟子細行也不足以責成人及天下余曰此又與於不孝之甚者也孝爲太和元氣故唐虞之際底豫克諧文武周公善繼善述孝在天下爲天下之元氣在一國爲一國之元氣在一家一身爲一家一身之元氣以孝爲瑣節細行者不亦管窺蠡測乎或復辨曰孝莫大於

尊養貧賤者尊養之薄也孝莫深於愛敬儀文者愛敬之名也吾之論孝與子異余曰固已夫子之爲孝不達於義也宜聖以孝廸人而顏曾閔路不妨貧賤丐兒以孝自盡而拜跪歌舞亦有儀文使必尊養而後爲孝則耕山漁河何以先貧賤而升聞也使必去儀文而後爲孝則溫清定省何以明愛敬而錫類也誠如子言是以寢門問豎爲近於名而捧檄色喜爲薄於行矣豈通論乎或起謝曰說必詳而後約學必講而後明吾非欲肆辨於子也得子之說始信孝子之言不可不多聞而孝

子之行不可不多見也然取孝經而內外傳之亦有說乎余曰有孔子云我志在春秋行在孝經春秋莫大於尊王孝經莫大於嚴父則孝經之重於天壤間也與春秋並左氏取春秋而內外傳之今左傳三十卷春秋之內傳也國語二十一篇春秋之外傳也詞不必與春秋類而無不與春秋相發明焉余之傳孝經而卷分內外也亦猶是焉爾余漸摩童子之天性親承長者之緒論久矣不有斯傳何以爲子何以爲人何以爲人子師至於後有伐吾傳如伐左氏黨吾傳如黨左氏者吾不遑

計也漫序於右

康熙十五年丙辰歲暮月上弦楚黃後學李之素題於  
望花西壇

孝經正文

楚黃李之素定庵述

開宗明義章第一

仲尼居曾子侍子曰先王有至德要道以順天下民用  
和睦上下無怨女知之乎曾子辟席曰參不敏何足以  
知之子曰夫孝德之本也教之所繇生也後坐吾語女  
身體髮膚受之父母不敢毀傷孝之始也立身行道揚  
名於後世以顯父母孝之終也夫孝始於事親中於事  
君終於立身大雅云無念爾祖聿修厥德

曾子名參少孔子四十六歲志存孝道故孔子因之以作孝經以爲非孝子不可以傳吾道也順天下順人心之自然而教化之也立身成其身也行道卽行此孝道也無念念也引詩言爲人子孫當恒念爾之先祖傳述其功德而行之勿墜其統緒也

## 天子章第二

子曰愛親者不敢惡於人敬親者不敢慢於人愛敬盡於事親而德教加於百姓刑於四海蓋天子之孝也甫刑云一人有慶兆民賴之

刑型法也甫刑周書呂刑也一人天子也慶善也愛親敬親者天子自愛敬其親也不敢惡於人慢於人者使人皆愛敬其親也愛敬盡於天下之事親而至德要道之教加於百姓則四海慕化皆儀刑而同歸於孝矣引書之言有善皆賴所謂上行下效也

諸侯章第三

在上不驕高而不危制節謹度滿而不溢高而不危所以長守貴也滿而不溢所以長守富也富貴不離其身然後能保其社稷而和其民人蓋諸侯之孝也詩云戰



戰兢兢如臨深淵如履薄冰

制節用財有節也謹度恪守法度也引小雅小旻之詩言諸侯富貴不可驕溢恐懼戒慎使不至於墜陷也

卿大夫章第四

非先王之法服不敢服非先王之法言不敢道非先王之德行不敢行是故非法不言非道不行口無擇言身無擇行言滿天下無口過行滿天下無怨惡三者備矣然後能守其宗廟蓋卿大夫之孝也詩云夙夜匪懈以

事一人

無擇言行皆遵法合道而無容選擇也三者備服飾言行皆全備無虧也引蒸民之詩言卿大夫當敬事天子以保宗廟永奉祭祀也

士章第五

資於事父以事母而愛同資於事父以事君而敬同故母取其愛而君取其敬兼之者父也故以孝事君則忠以敬事長則順忠順不失以事其上然後能保其祿位而守其祭祀蓋士之孝也詩云夙興夜寐無忝爾所生

資取也以用也愛同愛父與愛母同也敬同敬父與敬君同也合愛與敬而兼之者惟父然也長上皆指君引小雅宛之詩言士行孝當夙夜勤謹無辱其父母也

庶人章第六

用天之道分地之利謹身節用以養父母此庶人之孝也故自天子至於庶人孝無終始而患不及者未之有也

天道春生夏長秋收冬藏也地利高下燥濕所產之

利也謹修其身不妄爲也節省其用不妄費也獨不  
引詩者義盡於此不容贅也結言孝無貴賤始終之  
異而患孝道至大已身不能企及者自古至今未有  
此理天子庶人之孝分量不同而孝則一天子庶人  
不同而天則一庶人之養親卽庶人之事天恐後世  
揣以分量大小觀孝故曰啜菽飲水盡其歡斯之謂  
孝

三才章第七

曾子曰甚哉孝之大也子曰夫孝天之經也地之義也

民之行也天地之經而民是則之則天之明因地之利以順天下是以其教不肅而成其政不嚴而治先王見教之可以化民也是故先之以博愛而民莫遺其親陳之以德義而民興行先之以敬讓而民不爭導之以禮樂而民和睦示之以好惡而民知禁詩云赫赫師尹民具爾瞻

天以生覆爲常故曰經地以承順利物爲宜故曰義則法也肅戒也夫子言孝道雖大豈自先王有哉人生天地之間得天之性爲慈愛得地之性爲恭順慈

愛恭順卽爲孝行也孝本天地之常經而人取則焉  
故聖人法天之明以顯其常因地之利以行其宜順  
此以施政教故不肅戒而成不威嚴而治博愛德義  
敬讓禮樂好惡皆以孝言引南山之詩言太師爲民  
模範不可不慎也

### 孝治章第八

子曰昔者明王之以孝治天下也不敢遺小國之臣而  
況於公侯伯子男乎故得萬國之歡心以事其先王治  
國者不敢侮於鰥寡而況於士民乎故得百姓之歡心

以事其先君治家者不敢失於臣妾而況於妻子乎故  
得人之歡心以事其親夫然故生則親安之祭則鬼享  
之是以天下和平災害不生禍亂不作故明王之以孝  
治天下也如此詩云有覺德行四國順之

小國之臣子男之卿大夫也覺大也順從也事先王  
事先君以盡職助祭言安之安其養也享之享其祭  
也和平從其治也引大雅抑之詩言有大德行而爲  
四國之從者以證之

聖治章第九

曾子曰敢問聖人之德無以加於孝乎子曰天地之性  
人爲貴人之行莫大於孝孝莫大於嚴父嚴父莫大於  
配天則周公其人也昔者周公郊祀后稷以配天宗祀  
文王於明堂以配上帝是以四海之內各以其職來祭  
夫聖人之德又何以加於孝乎故親生之膝下以養父  
母日嚴聖人因嚴以教敬因親以教愛聖人之教不肅  
而成其政不嚴而治其所因者本也父子之道天性也  
君臣之義也父母生之續莫大焉君親臨之厚莫重焉  
故不愛其親而愛他人者謂之悖德不敬其親而敬他



人者謂之悖禮以順則逆民無則焉不在於善而皆在  
於凶德雖得之君子不貴也君子則不然言思可道行  
思可樂德義可尊作事可法容止可觀進退可度以臨  
其民是以其民畏而愛之則而象之故能成其德教而  
行其政令詩云淑人君子其儀不忒

嚴尊敬也敬之大者莫如配享上天周公攝政郊祀  
祭天則以后稷配尊后稷猶天也宗祀祭上帝則以  
文王配尊文王猶上帝也周公尊敬其祖父則德教  
刑於四海而四海諸侯皆來助祭孝道之感人如是

故親愛之心生於膝下孩幼之年漸長則日加尊嚴以致敬於父母是以聖人因親嚴之心敦其愛敬之教所以不待肅嚴而成治也其所因者本於孝也續者父子相繼人倫莫大於此也親爲君以臨乎已三綱莫重乎此也苟自不能愛敬其親而教令他人皆愛敬其親者是謂悖逆本心之德天理之宜也惟人君令行政教以順天下今自逆不行使天下之民無所法則乃不在於愛敬之善而皆在於悖逆之凶德雖得志居於民上而有道君子能不賤惡之哉若聖

人君子則不爲悖德悖禮之事必思合於義理而後  
言必思悅於人心而後行故立德制義不違於道而  
言可尊崇制作事業必得其宜而行可法則威儀動  
靜合於規矩而可爲觀望可爲法度君行此六者以  
臨蒞斯民則民皆畏威懷德而則象之故上行下效  
德教以此而成政令以此而行也引曹風鳴鳩之詩  
言君子威儀無有差忒豈不爲人法則哉信乎君子  
之德不可少也

紀孝行章第十

子曰孝子之事親也居則致其敬養則致其樂病則致其憂喪則致其哀祭則致其嚴五者備矣然後能事親事親者居上不驕爲下不亂在醜不爭居上而驕則亾爲下而亂則刑在醜而爭則兵三者不除雖日用三牲之養猶爲不孝也

五者咸備能盡人道矣而盡性盡天存焉三者不除去天遠矣必致危亾之禍雖日奉牛羊豕三牲之養自謂盡禮親得安坐而食乎故知事親自謹身始

五刑章第十一

子曰五刑之屬三千而罪莫大於不孝要君者無上非聖人者無法非孝者無親此大亂之道也

五刑墨劓剕宮大辟也墨屬千劓屬千剕屬五百宮屬三百大辟屬二百要有所挾而求也非詆毀之也聖人知不孝卽大亂之道故因不孝而立刑書

### 廣要道章第十二

子曰教民親愛莫善於孝教民禮順莫善於悌移風易俗莫善於樂安上治民莫善於禮禮者敬而已矣故敬其父則子悅敬其兄則弟悅敬其君則臣悅敬一人而

千萬人悅所敬者寡而所悅者衆此之謂要道也

夫子言君欲教民親於君而愛之者莫善於身自行孝則君行而民效之皆親愛其君矣欲教民禮於長而順之者莫善於身自行悌則上行而下效之皆順從其長矣禮樂皆本孝悌言天子敬一父兄君而千萬人之爲子弟臣者皆悅此要道之義也

廣至德章第十三

子曰君子之教以孝也非家至而日見之也教以孝所以敬天下之爲人父者也教以悌所以敬天下之爲人

兄弟也教以臣所以敬天下之爲人君者也詩云豈弟君子民之父母非至德孰能順民如此其大者乎

子言君子教人以孝事親非必人人耳提面命但自行孝於內則其化自流於外身教以孝則天下皆知敬父身教以悌則天下皆知敬兄身教以臣則天下皆知敬君引詩言君子能順民心而行教化以爲民之父母非至德之君孰能順民心如此其廣大者乎

廣揚名章第十四

子曰君子之事親孝故忠可移於君事兄悌故順可移

於長居家理故泊可移於官是以行成於內而名立於後世矣

居家理行成於內俱本孝悌言

諫評章第十五

曾子曰若夫慈愛恭敬安親揚名則聞命矣敢問子從父之令可謂孝乎子曰是何言與是何言與昔者天子有爭臣七人雖無道不失其天下諸侯有爭臣五人雖無道不失其國大夫有爭臣三人雖無道不失其家士有爭友則身不離於令名父有爭子則身不陷於不義



故當不義則子不可以不爭於父臣不可以不爭於君  
故當不義則爭之從父之令又焉得爲孝乎

陷親不義不得爲孝

感應章第十六

子曰昔者明王事父孝故事天明事母孝故事地察長  
幼順故上下治天地明察神明彰矣故雖天子必有尊  
也言有父也必有先也言有兄也宗廟致敬不忘親也  
修身慎行恐辱先也宗廟致敬鬼神著矣孝悌之至通  
於神明光於四海無所不通詩云自西自東自南自北

無思不服

王者父天而母地故事父母孝則事天之道能明事地之義能察又於宗族之中皆順於理則上下之人無不自化矣事天地既能明察必致福應而神明之功效彰矣宗廟致敬又從事父兄而推廣之皆不忍忘親之意也恐辱先恐其德業不能世守也鬼神著祖考來格而福祿綏之也若能敬宗廟順長幼以極孝悌之心則感通神明誠無不格光照四海理無不明矣引有聲之詩言遠近皆心服益見德化之感應

無所不通也

事君章第十七

子曰君子之事上也進思盡忠退思補過將順其美匡救其惡故上下能相親也詩云心乎愛矣遐不謂矣中心藏之何日忘之

子言君子事上其進朝也則思以已之善道盡忠於君其退朝也則思君有過失已當補塞進則復言將順其君之美匡救其君之惡如此則君臣上下情通志協能相親也引小雅隰桑之詩言忠臣事君雖有

時遠離不在左右然心乎愛君不謂之遠中心常藏  
此事君之道何日得遺忘之乎

喪親章第十八

子曰孝子之喪親也哭不偯禮無容言不文服美不安  
聞樂不樂食旨不甘此哀感之情也三日而食教民無  
以死傷生毀不滅性此聖人之政也喪不過三年示民  
有終也爲之棺槨衣衾而舉之陳其簠簋而哀感之擗  
踊哭泣哀以送之卜其宅兆而安厝之爲之宗廟以鬼  
享之春秋祭祀以時思之生事愛敬死事哀感生民之

本盡矣死生之義備矣孝子之事親終矣

言孝子之喪親哭以氣竭而止無餘哀之聲舉措進退之禮無趨翔之容有事應言不爲文飾人子不食過三日則傷生矣故不得哀死而傷生雖毀瘠而不滅絕其性及其將葬則陳簠簋祭奠而加哀感男踊女擗悲哀以往送之爲墓於郊卜選宅兆之地而安葬之既葬之後則爲宗廟以鬼神之禮享之三年之後春秋祭祀以時思親不忍忘之是以親存則盡愛敬以事之親亾則盡哀感以事之生民一本之道盡

矣死生無憾之義備矣孝子之事親乃克有終矣爲  
人子者取孝經之義熟玩而勉行之庶乎子道全而  
人道亦無虧矣

孝經正文終

朱子孝經刊誤

古今文有不同者別見考異

仲尼問居曾子侍坐子曰參先王有至德要道以順天下民用和睦上下無怨汝知之乎曾子避席曰參不敏何足以知之子曰夫孝德之本也教之所由生復坐吾語汝身體髮膚受之父母不敢毀傷孝之始也立身行道揚名於後世以顯父母孝之終也夫孝始於事親中於事君終於立身大雅云毋念爾祖聿修厥德子曰愛親者不敢惡於人敬親者不敢慢於人愛敬盡於事親而德教加於百姓刑于四海蓋天子之孝甫刑云一人



有慶兆民賴之在上不驕高而不危制節謹度滿而不溢高而不危所以長守貴滿而不溢所以長守富富貴不離其身然後能保其社稷而和其民人蓋諸侯之孝詩云戰戰兢兢如臨深淵如履薄冰非先王之法服不敢服非先王之法言不敢道非先王之德行不敢行是故非法不言非道不行口無擇言身無擇行言滿天下無口過行滿天下無怨惡三者備矣然後能守其宗廟蓋卿大夫之孝也詩云夙夜匪懈以事一人資於事父以事母而愛同資於事父以事君而敬同故母取其愛

而君取其敬兼之者父也故以孝事君則忠以敬事長則順忠順不失以事其上然後能保其爵祿而守其祭祀蓋士之孝也詩云夙興夜寐毋忝爾所生子曰用天之道因地之利謹身節用以養父母此庶人之孝也故自天子以下至于庶人孝無終始而患不及者未之有也

此一節夫子曾子問食之言而曾氏門人之所記也疑所謂孝經者其本文止如此其下則或者雜引傳記以釋經文乃孝經之傳也竊嘗攷之傳文固多傳

會而經文亦不免有離析增加之失顧自漢以來諸  
儒傳誦莫覺其非至或以爲孔子之所自著則又可  
笑之尤者蓋經之首統論孝之終始中乃敷陳天子  
諸侯卿大夫士庶人之孝而其末結之曰故自天子  
以下至於庶人孝無終始而患不及者未之有也其  
首尾相應次第相承文勢連屬脈絡通貫同是一時  
之言無可疑者而後人妄分以爲六十七章  
今文作六章古文作七章又增子曰及引詩書之文以雜乎其間使其文意  
分斷間隔而讀者不復得見聖言全體大義爲害不

經故今定此六七章者合爲一章而刪去子曰者二  
引書者一引詩者四凡六十一字以復經文之舊其  
傳文之失又別論之如左方

曾子曰甚哉孝之大也子曰夫孝天之經地之義民之  
行天地之經而民是則之則天之明因地之義以順天  
下是以其教不肅而成其政不嚴而治先王見教之可  
以化民也是故先之以博愛而民莫遺其親陳之以德  
義而民興行先之以敬讓而民不爭導之以禮樂而民  
和睦示之以好惡而民知敬詩云赫赫師尹民具爾瞻

此以下皆傳文而此一節蓋釋以順天下之意當爲傳之三章而今失其次矣但自其章首以至因地之義皆是春秋左氏傳所載子太叔爲趙簡子道子產之言唯易禮字爲孝字而文勢反不若彼之通貫條目反不若彼之完備明此襲彼非彼取此無疑也

子產

曰夫禮天之經地之義民之行也天地之經而民寔則之則天之明因地之性其下便陳天明地性之目與其所以則之因之之寔然後簡子贊之曰甚哉禮之大也首尾通貫節目詳備與此不同

其曰

先王見教之可以化民又與上文不相屬故溫公改教爲孝乃得粗通而下文所謂德義敬讓禮樂好惡

者卻不相應疑亦裂取他書之成文而強加裝綴以爲孔子曾子之問富但未見其所出耳然其前段文雖非是而理猶可通存之無害至於後段則文既可疑而謂聖人見孺可以化民而後以身先之於理又已悖矣況先之以博愛亦非立愛惟親之序若之何而能使民不遺其親耶其所引詩亦不親切今定先王見教以下凡六十九字並刪去

子曰昔者明王之以孺治天下也不敢遺小國之臣而況於公侯伯子男乎故得萬國之懽心以事其先王治

國者不敢侮於鰥寡而況於士民乎故得百姓之懽心  
以事其先君治家者不敢失於臣妾而況於妻子乎故  
得人之懽心以事其親夫然故生則親安之祭則鬼享  
之是以天下和平災害不生禍亂不作故明王之以孝  
治天下如此詩云有覺德行四國順之

此一節釋民用和睦上下無怨之意爲傳之四章其  
言雖善而亦非經文之正意蓋經以孝而和此以和  
而孝也引詩亦無甚失且其下文語已更端無所隔

礙故今且得仍舊耳

後不言合刪  
改首放此

曾子曰敢問聖人之德其無以加於孝乎子曰天地之  
性人爲貴人之行莫大於孝孝莫大於嚴父嚴父莫大  
於配天則周公其人也昔者周公郊祀后稷以配天宗  
祀文王於明堂以配上帝是以四海之內各以其職來  
助祭夫聖人之德又何以加於孝乎故親生之膝下以  
養父母曰嚴聖人因嚴以孝敬因親以教愛聖人之教  
不肅而成其政不嚴而治其所因者本也

此一節釋孝德之本之意傳之五章也但嚴父配天  
本因論武王周公之事而贊美其孝之詞非謂凡爲



孝者皆欲如此也又况孝之所以爲大者本自有親切處而非此之謂乎若必如此而後爲孝則是使爲人臣子者皆有今將之心而反陷於大不孝矣作傳者但見其論孝之大卽以附此而不知其非所以爲天下之通訓讀者詳之不以文害意焉可也其曰故親生之膝下以下意卻親切但與上文不屬而與下章相近故今文連下二章爲一章但下章之首語已更端意亦重複不當通爲一章此語當依古文且附上章或自別爲一章可也

子曰父子之道天性君臣之義父母生之續莫大焉君  
親臨之厚莫重焉子曰不愛其親而愛他人者謂之悖  
德不敬其親而敬他人者謂之悖禮以順則逆民無則  
焉不在於善皆在於凶德雖得之君子所不貴君子則  
不然言斯可道行斯可樂德義可尊作事可法容止可  
觀進退可度以臨其民是以其民畏而愛之則而象之  
故能成其德教而行政令詩云淑人君子其儀不忒

此一節釋教之所由生之意傳之六章也古文析不  
愛其親以下別爲一章而各冠以子曰今文則合之

而又通上章爲一章無此二子曰罕而於不愛其親  
之上加故字今詳此章之首卻寔更端當以古文爲  
正不愛其親語意正與上文相續當以今文爲正至  
君臣之義之下則又當有脫簡焉今不能知其爲何  
字也悖禮以上皆格言但以順則逆以下則又雜取  
左傳所載季文子北宮文子之言與此上文既不相  
應而彼此得失又如前章所論子產之語今刪去凡  
九十字

季文子曰以訓則昏民無則焉不度于善而  
皆在于凶德是以去之北宮文子曰君子在  
位可畏施舍可愛進退有度周旋可則容止可觀作  
事可法德行可象聲氣可樂動作有文言語有章以

臨其

下

子曰季子之事親居則致其敬養則致其樂病則致其憂喪則致其哀祭則致其嚴五者備矣然後能事親事親者居上不驕爲下不亂在醜不爭居上而驕則亾爲下而亂則刑在醜而爭則兵此三者不除雖日用三牲之養猶爲不孝也

此一節釋始於事親及不敢毀傷之意乃傳之七章亦格言也

子曰五刑之屬三千而罪莫大於不孝要君者無上非

孝經正文  
聖人者無法非孝者無親此大亂之道也

此一節因上文不孝之云而繫於此乃傳之八章亦格言也

子曰教民親愛莫善於孝教民禮順莫善於弟移風易俗莫善於樂安上治民莫善於禮禮者敬而已矣故敬其父則子悅敬其兄則弟悅敬其君則臣悅敬一人而千萬人悅所敬者寡而悅者衆此之謂要道

此一節釋要道之意當爲傳之二章但經所謂要道當自巳而推之與此亦不同也

子曰君子之教以孝也非家至而日見之也教以孝所以敬天下之爲人父者教以悌所以敬天下之爲人兄者教以臣所以敬天下之爲人君者詩云愷悌君子民之父母非至德其孰能順民如此其大者乎

此一節釋至德以順天下之意當爲傳之首章然所論至德語意亦疎如上章之失云

子曰昔者明王事父孝故事天明事母孝故事地察長幼順故上下治天地明察神明彰矣故雖天子必有尊也言有父也必有先也言有兄也宗廟至敬不忘親也

修身慎行恐辱先也宗廟致敬鬼神著矣孝悌之至通於神明光於四海無所不通詩云自西自東自南自北無思不服

此一節釋天子之孝有格言焉當爲傳之十章

或云宜爲

十二章

子曰君子之事親孝故忠可移於君事兄悌故順可移於長居家理故治可移於官是故行成於內而名立於後世矣

此一節釋立身揚名及士之孝傳之十一章也

或云宜爲

九章

子曰閨門之內具禮矣乎嚴父嚴兄妻子臣妾備百姓  
徒役也

此一節因上章三可移而言傳之十二章也嚴父孝

也嚴兄弟也妻子臣妾官也

或云宜  
爲十章

曾子曰若夫慈愛恭敬安親揚名參聞命矣敢問從父  
之令可謂孝乎子曰是何言與是何言與昔者天子有  
爭臣七人雖無道不失其天下諸侯有爭臣五人雖無  
道不失其國大夫有爭臣三人雖無道不失其家士有



爭友則身不離於令名父有爭子則身不陷於不義故  
當不義則子不可以弗爭於父臣不可以弗爭於君故  
當不義則爭之從父之令又焉得爲孝乎

此不解經而別發一義宜爲傳之十三章

子曰君子事上進思盡忠退思補過將順其美匡救其  
惡故上下能相親詩曰心乎愛矣遐不謂矣中心藏之  
何日忘之

此一節釋忠於事君之意當爲傳之九章

或云宜爲  
十一章

因上章爭臣而誤屬於此耳進思盡忠退思補過亦

左傳所載士貞子語然於文理無害引詩亦足以發  
明移孝事君之意今並存之

子曰孝子之喪親哭不偯禮無容言不文服美不安聞  
樂不樂食旨不甘此哀戚之情三日而食教民無以死  
傷生毀不滅性此聖人之政喪不過三年示民有終爲  
之棺槨衣衾而舉之陳其筭簋而哀戚之僻踊哭泣哀  
以送之卜其宅兆而安措之爲之宗廟以鬼享之春秋  
祭祀以時思之生事愛敬死事哀戚生民之本盡矣死  
生之義備矣孝子之事親終矣

傳之十四章亦不解經而別發一義其語尤精約也  
熹舊見衡山胡侍郎論語說疑季經引詩非經本  
文初甚駭焉徐而察之始悟胡公之言爲信而季  
經之可疑者不但此也因以書質之沙隨程可久  
丈程畬書曰頃見玉山汪端明亦以爲此書多出  
後人傳會於是乃知前輩讀書精審其論固已及  
此又竊自幸有所因述而得免於鑿空妄言之罪  
也淳熙丙午八月十二日記

孝經內傳卷之一

楚黃李之素定庵編輯

大哉乾元萬物資始乃統天

乾卦

蘭廷瑞曰乾元者天陽一元之氣亦如人之有元氣也人知萬物之生於地而不知天以乾元之氣爲之始亦如人之生於母而不知資始於父之元氣也始之於未生之前生之於有始之後

至哉坤元萬物資生乃順承天坤厚載物德合無疆

坤卦

程頤曰萬物資乾以始資坤以生父母之道也順承

天施以成其功坤之厚德持載萬物合於乾之無疆也

家人有嚴君焉父母之謂也父父子子兄兄弟夫夫婦婦而家道正正家而天下定矣

家人卦

程頤曰無尊嚴則孝敬衰

有天地然後有萬物有萬物然後有男女有男女然後有夫婦有夫婦然後有父子有父子然後有君臣有君臣然後有上下有上下然後理義有所錯

乾天也故稱乎父坤地也故稱乎母震一索而得男故

謂之長男娶一索而得女故謂之長女坎再索而得男  
故謂之中男離再索而得女故謂之中女艮三索而得  
男故謂之少男兌三索而得女故謂之少女繫辭

朱震曰將說天地生物而先言人者天地之性人爲  
貴萬物皆備於人也乾天也爲陰之父坤地也爲陽  
之母萬物分天地也男女分萬物也察乎此則天地  
與我竝生萬物與我同體是故聖人親其親長其長  
而天下平伐一艸木殺一禽獸非其時謂之不孝

柴中行曰物物有男女之象天地之性人爲貴故以

人言之耳或曰乾坤生萬物孰見其長中少物自爲父母而生也殊不知父母之生師天地之生豈父母之外別有天地之生乎

帝曰契百姓不親五品不遜汝作司徒敬敷五教在寬

舜典

五品父子君臣夫婦長幼朋友五者之名位等級也五教父子有親君臣有義夫婦有別長幼有序朋友有信以五者當然之理而爲教令也聖賢之於事雖無所不敬而此又事之大者故特以敬言之蓋五者

之理出於人心之本然非有強而後能者自其拘於  
氣質之偏溺於物欲之蔽始有昧於其理而不相親  
愛不相遜順者因申命契仍爲司徒使之敬以敷教  
而又寬裕以待之使其優柔浸漬以漸而入則其天  
性之真自然呈露不能自己而無無耻之患矣

伊尹曰今王嗣厥德罔不在初立愛惟親立敬惟長始  
於家邦終於四海

伊訓

謹始之道孝弟而已孝弟者人心之所同非必人人  
教詔之立愛敬於此而刑愛敬於彼親吾親以及人



之親長吾長以及人之長始於家達於國終而措之天下矣

王曰封元惡大憝矧惟不孝不友子弗祗服厥父事大傷厥考心於父不能字厥子乃疾厥子於弟弗念天顯乃弗克恭厥兄兄亦不念鞠子哀大不友於弟惟予茲不於我政人得罪天惟與我民彝大泯亂曰乃其速由文王作罰刑茲無赦

康誥

寇攘姦宄固大可惡矣然於大倫猶未數也況不孝不弟之人尤爲可惡者乎蓋不孝之子不能敬事其

父大傷其父心以致爲父者亦不能愛其子乃疾惡其子是父子相夷也天顯猶孝經所謂天明尊卑顯然之序也於弟不念上天顯設長幼之倫紀不能敬事其兄以致爲兄者亦不念父母鞠養之勞大不友於弟是兄弟相賊矣父子兄弟至於如此不於我治政之臣而得罪焉則天與吾民之常道必大泯滅而紊亂矣罰可乎汝其速由文王監殷所作之罰刑此不孝不弟之人不可緩也

王曰妹土嗣爾股肱純其藝黍稷犇走事厥考厥長肇

牽車牛遠服賈用孝養厥父母厥父母慶自洗腆致用

酒  
酒誥

此武王教妹土之民當嗣續汝四肢之力無有怠惰  
大修農功服勞田畝奔走以事其父母或斂於貿易  
牽車牛遠事賈以孝養其父母父母喜慶然後可自  
洗腆致用酒洗以致其潔腆以致其厚也

成王曰爾尚蓋前人之愆惟忠惟孝爾乃邁跡自身克  
勤無怠以垂憲乃後率乃祖文王之彝訓無若爾考之

違王命  
蔡仲之命

蔡叔之罪在於不忠不孝仲能掩前人之愆者惟在  
於忠孝而已叔違王命仲無所因故曰邁跡自身克  
勤無怠所謂自身也垂憲乃後所謂邁跡也能如是  
則可謂率乃祖文王忠孝之常訓不若爾父之不忠  
不孝而違王命者矣

陟彼岵兮瞻望父兮父曰嗟予子行役夙夜無已上慎  
旃哉猶來無止陟彼屺兮瞻望母兮母曰嗟予季行役  
夙夜無寐上慎旃哉猶來無棄陟彼岡兮瞻望兄兮兄  
曰嗟予弟行役夙夜必偕上慎旃哉猶來無死

小序曰孝子行役思念父母也

輔廣曰既思其父又思其母又思其兄既想像其念已之言又想像其祝已之言曰庶幾其謹之哉則斯人也必能以其親之心爲心亦可謂賢矣

言告師氏言告言歸薄汚我私薄澣我衣害澣害否歸寧父母以上國風

朱善曰師氏導我者也每事詢訪不敢端也父母生我者也及時問安不敢忘也君子宗主我者也因師致告不敢褻也

蓼蓼者莪匪莪伊蒿哀哀父母生我劬勞蓼蓼者莪匪  
莪伊蔚哀哀父母生我勞瘁餅之罄矣維嚚之耻鮮民  
之生不如死之久矣無父何怙無母何恃出則銜恤入  
則靡至父兮生我母兮鞠我拊我畜我長我育我顧我  
復我出入腹我欲報之德昊天罔極小雅

謝枋得曰此章形容父母愛子之心盡之矣生我如  
天之生物也鞠我如地之養物也拊我撫摩其身體  
察其肥瘠憂其疥癬也畜者謹其出入察其起居藏  
之堂與之中不敢縱之門庭之外惟恐其疾病也長

者如南風之長萬物調和其身體資養其血氣日夜  
望之長大育者如易曰育德孟子教育英才涵養其  
德性發舒其志氣開導其聰明日夜望其成人也顧  
者父母行而兒不隨則回顧之也復者兒行而父母  
不隨則追喚之也腹者懷抱於腹間也父母有所往  
懷抱其子而不忍捨父母自外歸既入門懷抱其子  
而未肯置人能深思九字之義必不怠父母之恩矣  
成王之孚下土之式永言孝思孝思惟則

大雅

朱熹集傳曰言武王所以能成王者之信而爲四方

之法者以其長言孝思而不怠是以其孝爲可法耳  
若有時而怠之則其孝者僞耳何足法哉

凡爲人子之禮冬溫而夏清昏定而晨省在醜夷

平等也

不爭

溫清定省養其體也不忘身及親養其志也

見父之執不謂之進不敢進不謂之退不敢退不問不敢對此孝子之行也

方慤曰孔子曰愛親者不敢惡於人敬親者不敢慢於人見父之執於進退之節有所不敢則一舉足不敢怠親可知於對問之節有所不敢則一出言不敢



忌親可知孝子之行孰過於是

夫爲人子者出必告

音格

反必面

自外來欲省顏色故言面

所遊必有

常所習必有業恒言不稱老

陳澧曰恒言平常言語之間也自以老稱則尊同於

父母而父母爲過於老矣古人所以斑衣娛戲者欲

安父母之心也

爲人子者居不主奧

室西南隅

坐不中席

主奧中席皆尊者之道也

行不

中道立不中門

不敢述尊者之所行

食

音嗣

饗不爲槩

不爲槩量限節順親之心

也

祭祀不爲尸

人子所不安

聽於無聲視於無形

先意承志

不登

高不臨深不苟訾

音紫為近于謔

不苟笑

為近于詔

不服閤

不欺人所不見

也不登危

不行險以微幸

懼辱親也父母存不許友以死

不為友報

簪不有私財

父母有疾冠者不櫛

不為飾也

行不翔

不為容也

言不惰

情訛不正之言

琴瑟不御食肉不至變味

多品厭飲則口味變

飲酒不至變貌

有人

常貌遇量則變

笑不至矧

齒本日矧見矧是大笑也

怒不至詈

怒罵曰詈怒而至詈是甚

怒也疾止復故

復其故常

居喪之禮毀瘠

羸瘦

不形

不露骨

視聽不衰升降不由阼階

出入不當門隧居喪之禮頭有創聲

平聲

則沐身有瘍

音則

浴有疾則飲酒食肉疾止復初不勝

音升

喪乃比於不慈

不孝

下不足以傳後故比於不慈  
上不足以奉先故比於不孝

方慤曰毀瘠不形慮或至於滅性故也居喪之禮雖

哭泣無時然不可以過哀而喪其明焉雖聞樂不樂

音洛然不可以過哀而瞶其聰焉視聽衰則不足以當

大事也雜記

禮記篇名

言視不明聽不聰君子病之者以

此前言爲人子者居不主與行不中道及其居喪則

升降不由阼階出入不當門隧者事死如事生也

子之事親也三諫而不聽則號泣而隨之君有疾飲藥

臣先嘗之親有疾飲藥子先嘗之醫不三世不服其藥

以上  
曲禮

子路曰吾聞諸夫子喪禮與其哀不足而禮有餘也不若禮不足而哀有餘也祭禮與其敬不足而禮有餘也不若禮不足而敬有餘也

喪禮哀戚之至也節哀順變也君子念始之者也

陳澧曰孝子之哀發於天性之極至豈可止過聖人制禮以節其哀蓋順以變之也言順孝子之哀情漸變而輕減也始猶生也生我者父母毀而滅性是不

念生我者矣

子路曰傷哉貧也生無以爲養死無以爲禮也孔子曰啜菽飲水盡其歡斯之謂孝歛首足形還葬而無槨稱其財斯之謂禮以上檀弓

子事父母鷄初鳴咸盥漱

音素櫛紒

音洗笄

音基

總拂髦冠綏

纓端韠

音必

紳搢笏左右佩用

鷄初鳴咸盥漱者夙興以致其潔也櫛梳也紒髻也總髮也拂髦髮也冠綏

作髻也笄加簪也總束髮飾髻也髦用髮爲之古人生子三月則剪胎髮爲髦帶之于首男左女右逮笄冠以綵飾之加于冠則謂之髦所以不忘父母生育之恩也拂去其髦上之塵也纓冠之絲結于領下以固冠者也綏纓之下垂者也端元端服也韠蔽膝也紳大帶也笏用竹爲之插于帶中所以記事也左右氛所佩之物知

悅刀之類所以備尊長使令之用也

婦事舅姑如事父母鷄初鳴咸盥漱櫛縱笄總衣紳左

右佩用

衣紳着衣而加紳也備用如鍼線之類也

以適父母舅姑之所及所

至寢所也

下氣怡聲問衣燠寒疾痛苛癢而敬抑搔之出入

則或先或後而敬扶持之進盥少者奉槃長者奉水請

沃盥匕卒授巾問所欲而敬進之柔色以溫之

苛疥也

痛則敬而抑以摩之有苛而癢則敬而搔以爬之先後扶持防其顛危也進盥則少者奉槃器輕易舉也長者奉水水蒲恐覆也溫者承藉之義也敬者或遇于肅故又柔色以承藉尊者之意也

父母舅姑之衣衾簞席枕几不傳杖履祇敬之勿敢近

敦牟卮匱非餽莫敢用與恒飲食非餽莫之敢飲食

傳移

也置有常處子婦不敢移置他處杖履服御之重者敬之不敢近恐污穢也敦與牟盛黍稷器卮盛酒器匱盛水漿器食餘曰餽非食用之餘不敢先者恐私擅不敬也

在父母舅姑之所有命之應唯敬對進退周旋慎齊升

降出入揖遊不敢噦噫噓咳欠伸跛倚睟視不敢唾洩

音替寒不敢襲

重衣也

癢不敢搔不有敬事不敢袒裼不涉

不擻褻衣衾不見褻

應唯聞聲面速應敬對有問而謹容慎齊此心謹慎齊莊不敢放肆

揖俯也遊揚也升階而入將近尊長其容俯若揖降階而出漸遠尊長其容舒若遊皆容之恭也噦噓逆聲噫哀聲噓噓噓咳嗽聲此聲之不恭也欠氣乏伸体倦跛偏任一足也倚匕着于物也睟視邪視也此氣之不恭

也決由鼻出者此貌之不恭也敬事謂習射擐謂搗其  
裳言非習射則不敢袒裼而露臂非涉水則不敢擐而  
搗裳褻衣衾近身常穢故不敢見其裏皆畏其不恭也

父母唾咳不見冠帶垢和灰請漱衣裳垢和灰請澣衣

裳綻裂紉箴請補綴

不見謂即刷除之不使見示于人  
也漱澣皆洗濯之事和灰如今人

用灰湯也以  
線貫箴爲紉

嚴陵方氏曰子之於親也衣而寒煥則問之體之苛

癢則搔之而於已則寒不敢襲癢不敢搔以至父母

之唾洩不見而已則唾洩不敢其所以愛親之心可

謂至矣



父母有過下氣怡色柔聲以諫諫若不入起敬起孝說

音悅則復

扶又反下同

諫不說與其得罪於鄉黨州閭寧孰諫

謂純熟殷勤而諫若物之成熟然

父母怒不說而撻之流血不敢疾怨

起敬起孝

真德秀曰起者悚然興起之意孰者反覆純熟之謂不諫是陷其親於不義得罪於州里等而上之諸侯而不諫則使其親得罪於國人天子而不諫則使其親得罪於天下是以寧孰諫也怒而撻之猶不敢怨況下於此者乎諫不入起敬起孝諫而怒亦起敬起

孝敬孝之外豈容有他哉豈容一息怠哉

父母雖沒將爲善思貽父母令名必果將爲不善思貽父母羞辱必不果

曾子曰孝子之養老也樂其心不違其志樂其耳目安其寢處以其飲食忠養之孝子之身終終身也者非終父母之身終其身也是故父母之所愛亦愛之父母之所敬亦敬之至於犬馬盡然而況於人乎

以上內則

真德秀曰孝子愛敬之心無所不至故父母之所愛敬者雖犬馬之賤亦愛敬之況人乎哉姑舉其敬者

言之若兄若弟吾父母之所愛也吾其可以不愛之乎若薄之是薄吾父母也若親若賢吾父母之所敬也吾其可以不敬之乎若嫚之是嫚吾父母也推類而長莫不皆然若晉武惑馮紆之讒不思太后之言而踈齊王攸唐高宗溺武氏之寵不念太宗顧託之命而殺長孫無忌皆禮經之罪人也

父命呼唯而不諾手執業則投之食在口則吐之走而不趨

親老出不易方復不過時親瘠色容不盛此孝子之疏

節也

父沒而不能讀父之書手澤存焉爾母沒而杯圈不能

飲焉口澤之氣存焉爾

以上玉藻

先王之孝也色不怠乎目

常若承顧

聲不絕乎耳

常若聽命

心志

嗜欲不怠乎心致愛則存致慤則著著存不怠乎心夫

安得不敬乎君子生則敬養死則敬享思終身弗辱也

輔廣曰天地之性人爲貴人之行莫大於孝乃人之

心也先王能存其心故父母之容色自不怠於目父

母之聲音自不絕於耳父母之心志嗜欲自不怠乎

心此固非勉強矯拂之所能然也亦致吾心之愛與敬而已愛則心也故曰存慤則誠也故曰著著存不怠乎心則洋洋乎如在其上如在其左右不可度思矧可射思夫安得不敬乎又曰一息不敬則絕乎理絕乎理則辱其親矣故生則敬養死則敬享是乃思終身弗辱也

孝子之有深愛者必有和氣有和氣者必有愉色有愉色者必有婉容孝子如執玉如奉盈洞洞屬屬然如弗勝如將失之嚴威儼恪非所以事親也成人之道也

曾子曰孝有三大孝尊親其次弗辱其下能養公明儀問於曾子曰夫子可以爲孝乎曾子曰是何言與是何言與君子之所謂孝者先意承志諭父母於道參直養者也安能爲孝乎

曾子曰身也者父母之遺體也行父母之遺體敢不敬乎居處不莊非孝也事君不忠非孝也涖官不敬非孝也朋友不信非孝也戰陳無勇非孝也五者不遂裁及於親敢不敬乎

君子之所謂孝也者國人稱願然曰幸哉有子如此所

謂孝也已衆之本教曰孝其行曰養養可能也敬爲難  
敬可能也安爲難安可能也卒爲難父母旣沒慎行其  
身不遺父母惡名可謂能終矣仁者仁此者也禮者履  
此者也義者宜此者也信者信此者也強者強此者也  
樂自順此生刑自反此作

曾子曰夫孝置之而塞乎天地溥之而橫乎四海施諸  
後世而無朝夕推而放諸東海而準推而放諸西海而  
準推而放諸南海而準推而放諸北海而準詩云自東  
自西自南自北無思不服此之謂也

孝有三小孝用力中孝用勞大孝不匱思慈愛忌勞可  
謂用力矣尊仁安義可謂用勞矣博施備物可謂不匱  
矣父母愛之喜而弗忌父母惡之懼而無怨父母有過  
諫而不逆父母既沒必求仁者之粟以祀之此之謂禮  
終

孝子將祭祀必有齊莊之心以慮事以具服物以修宮  
室以治百事及祭之日顏色必溫行必恐如懼不及愛  
然其奠之也容貌必溫身必訕如語焉而未之然宿者  
皆出其立卑靜以正如將弗見然及祭之後陶陶遂遂



如將復入然是故愍善不違身耳目不違心思慮不違  
親結諸心形諸色而術省之孝子之志也 以上祭義

凡治人之道莫急於禮禮有五經莫重於祭夫祭者非  
物自外至者也自中出生於心者也心怵而奉之以禮  
是故唯賢者能盡祭之義賢者之祭也必受其福非世  
所謂福也福者備也備者百順之名也無所不順者之  
謂備言內盡於已而外順於道也忠臣以事其君孝子  
以事其親其本一也上則順於鬼神外則順於君長內  
則以孝於親如此之謂備唯賢者能備能備然後能祭

是故賢者之祭也致其誠信與其忠敬奉之以物道之以禮安之以樂參之以時明薦之而已矣不求其爲此孝子之心也

孝子之事親也有三道焉生則養沒則喪喪畢則祭養則觀其順也喪則觀其哀也祭則觀其敬而時也盡此三道者孝子之行也

以上祭統

方慤曰以養志爲上養口體爲下此養之順也發音聲而見於衣服此喪之哀也所以交於神明者祭之敬也所以節其疏數者祭之時也孔子曰養則致其

樂喪則致其哀祭則致其嚴又曰春秋祭祀以時思  
之其言正與此合

葉夢得曰養則致其樂而此觀其順者順爲樂之形  
也喪則致其哀而此觀其哀者哀爲喪之本也祭則  
致其嚴而此觀其敬者敬爲嚴之體也

孔子曰仁人不過乎物孝子不過乎物是故仁人之事

親也如事天事天如事親是故孝子成身

哀公問

曾子曰人之生也百歲之中有疾病焉有老幼焉故君  
子思其不可復者而先施焉親戚旣沒雖欲孝誰爲孝

年既耆艾雖欲愉誰爲愉故孝有不及愉有不時其此之謂與

大戴禮

鄭武公娶於申曰武姜生莊公及共叔段莊公寤生驚姜氏遂惡莊公而愛共叔段欲立之武公弗許及莊公卽位克段於鄆乃寘姜氏於城穎而誓之曰不及黃泉無相見也旣而悔之穎考叔爲穎谷封人聞之有獻於公公賜之食食舍肉公問之對曰小人有母皆嘗小人之食矣未嘗君之羹請以遺之公曰爾有母遺緊我獨無穎考叔曰敢問何謂也公語之故且告之悔對曰君

何患焉若闕地及泉隧而相見其誰曰不然公從之公入而賦大隧之中其樂也融融姜出而賦大隧之外其樂也洩洩遂爲母子如初君子曰穎考叔純孝也愛其母施及莊公詩曰孝子不匱永錫爾類其是之謂乎

晉侯使太子申生伐山東臯落氏里克諫之不聽且曰寡人有子未知其誰立焉里克退見太子太子曰吾其廢乎里克對曰子懼不孝無懼弗得立修已而不責人則免於難

臧文仲曰見有禮於其君者事之如孝子之養父母也

見無禮於其君者誅之如鷹鷂之逐鳥雀也

季氏以公鉏爲馬正愠而不出閔子馬曰子無然禍福無門惟人所召爲人子者患不孝不患無所敬共父命何常之有若能孝敬富倍季氏可也茲回不軌禍倍下民可也公鉏然之敬共朝夕恪居官次季氏喜使飲已酒而以具往盡舍旃故公鉏氏富又出爲公左宰

以上左傳

有子曰其爲人也孝弟而好犯上者鮮矣不好犯上而作亂者未之有也君子務本本立而道生孝弟也者其爲仁之本與

程頤曰孝弟順德也德有本本立則其道充大孝弟行於家而後仁愛及於物所謂親親而仁民也故爲仁以孝弟爲本論性則以仁爲孝弟之本

朱熹曰仁是性孝弟是用譬如一粒粟生出爲苗仁是粟孝弟是苗便是仁爲孝弟之本又如木有根有幹有枝葉親親是根仁民是幹愛物是枝葉便是行仁以孝弟爲本

曾子曰慎終追遠民德歸厚矣

龜山楊氏曰孟子云養生不足以當大事惟送死可

以當大事則大事人子所宜慎也故三日而殯凡附於身者必誠必信勿之有悔焉耳矣夫一物不具皆悔也雖有悔焉無及矣此不可不慎也春秋祭祀以時思之所以追遠也齋之日思其居處思其笑語思其志意思其所樂思其所嗜齊三日乃見其所爲齊者則孝子所以盡其心者至矣以是而帥之民德其有不歸厚乎

子曰父在觀其志父沒觀其行三年無改於父之道可謂孝矣



延平李氏曰道者是猶可以通行者也三年之中日月易過若稍稍有不愜意處卽率意改之則孝子之心何在有孝子之心者自有所不忍耳非斯須不念極體孝道者能如是耶

孟懿子問孝子曰無違樊遲御子告之曰孟孫問孝於我我對曰無違樊遲曰何謂也子曰生事之以禮死塋之以禮祭之以禮

朱子曰魯之三家殯設揅則其塋也僭而不禮矣以雍徹則其祭也僭而不禮矣其事生之僭雖不可攷

然亦可想而知矣嗚呼彼爲是者其心豈不以爲足  
足以尊榮其親而爲莫大之孝夫豈知一違於禮則  
反置其親於僭叛不臣之域而自陷於莫大之下孝  
哉夫子因其問孝而知其有愛親之心故以此告之  
庶其有所感發而能自改也雖然聖人亦豈務爲陰  
語以中人之隱而徂之以遷善哉亦循理而言而物  
情事變自有所不得遁焉耳嗚呼此其所以爲聖人  
之言也與

孟武伯問孝子曰父母唯其疾之憂

尹氏曰疾病人所不免其遺父母憂者有不得已也若非義而遺父母之憂則不孝之大者矣

子夏問孝子曰色難有事弟子服其勞有酒食先生饌曾是以爲孝乎

勉齋黃氏曰事親之道非貴於聲音笑貌也而以色爲難者色非可以強爲也非其真有深愛存乎其心惟恐一毫拂其親之意者安能使愉婉之狀貌見於顏面也哉其告子夏者所以發其篤於愛親之念也或曰敬與愛兩事常相反也敬則病於嚴威愛則病

於柔順今其告游夏者如此得無舉一而廢一乎曰  
敬與愛皆事親之不能無也父母至親也而愛心生  
焉父母至尊也而敬心生焉皆天理之自然而非人  
之所強爲也然發之各有節而行之各有宜或過或  
不及則二者常相病也故聖人因其所偏者而警之  
所以勉其不足而損其有餘也

朱子曰既知二失則中間須自有箇處之之理愛而  
不敬非真愛也敬而不愛非真敬也觀此則敬愛原  
不做兩箇看愛曰深愛便含至誠惻怛之意前說已

言之矣若和氣便是無乖戾偏私纔能中節一有放肆便不和矣愉色雖訓悅觀私覲愉愉如也註則又和矣原根上執圭之敬而又加和正是敬之舒處婉容則婉曲與順惟恐有觸突親底意非敬而何如此體會愛敬自不是兩箇道理

或問孔子曰子奚不爲政子曰書云孝乎惟孝友於兄弟施於有政是亦爲政奚其爲爲政

倪氏曰書言孝友而起語獨言孝者友乃孝之推孝可包友也

子曰事父母幾諫見志不從又敬不違勞而不怨

胡氏曰子之事親主於愛雖父母有過不容不諫然必由愛心以發乃可放下氣怡色柔聲皆渙愛之形見者也所以謂幾微而諫不敢顯然直遂其已意也子曰父母在不遠遊遊必有方

楊氏曰一跬步不敢怠親況敢爲無方之遊乎

謝氏曰恐親念我不怠也若人子不以親之心爲心非孝子矣

子曰父母之年不可不知也一則以喜一則以懼

蔡虛齋曰聖人意重在懼上蓋喜者喜其已有此年  
懼者懼其將來之日不多也是所喜不足以敵其所  
懼聖人欲人子之知懼者欲其及時奉養而不懈耳  
古人一日養不以三公換嗚呼父母壽日增則衰亦  
日甚故曰孝子愛日

曾子有疾召門弟子曰啟予足啟予手詩云戰戰兢兢  
如臨深淵如履薄冰而今而後吾知免夫小子

慶源輔氏曰父母全而生之子全而歸之此祭義所  
載曾子述孔子之言也今若此可謂非苟知之亦允

昭之矣曾子平日見道明信道篤故能始終不渝

此

子曰孝哉閔子騫人不間於其父母昆弟之言

以上論語

曰氏口至行誠篤取信於父母昆弟人不得而間焉  
非成身之至不足以及是故曰孝子成身

為人子止於孝為人父止於慈

黃涵饒曰為人子止於孝不先父而先子何也父雖  
不慈子不可以不孝故先言子也

子曰父母其順矣乎



呂氏曰不得乎親不可以爲人不順乎親不可以爲  
子故君子之道莫大乎孝孝之本莫大乎順父母故  
仁人孝子欲順乎親必先乎妻子不失其好兄弟不  
失其和室家宜之妻帑樂之致家道成然後可以養  
父母之志而無違也行遠登高者謂孝莫大乎順其  
親者也自邇自卑者謂本乎妻子兄弟者也故身不  
行道不行於妻子女王刑於寡妻至於兄弟則治家  
之道必自妻子始

子曰舜其大孝也與德爲聖人尊爲天子富有四海之

內宗廟饗之子孫保之

西山真氏曰舜以聖德居尊位其福祿上及宗廟下延子孫所以爲大孝舜所知孝而已祿位名壽三命之非舜有心得之也

故大德者必受命

雲峰胡氏曰前言父母之順在於宐兄弟樂妻帑不過目前之事費之小者也此言孝之大在於宗廟饗子孫保則極其流澤之遠費之大者也前言費之小則曰居易以俟命學者事也此言費之大則曰大德

必受命聖人事也

子曰武王周公其達孝矣乎

西山真氏曰人君以光祖宗遺後嗣爲孝舜之孝如天之不可名故曰大武王周公之孝天下稱之無異辭故曰達

夫孝者善繼人之志善述人之事者也

新安陳氏曰祖父有欲爲之志而未爲子孫善繼其志而成就之祖父有已爲之事而可法子孫善因其事而遵述之

敬其所尊愛其所親事死如事生事亾如事存孝之至也

楊氏曰敬親者不敢慢於人況其所尊乎愛親者不敢惡於人況其所親乎事死如事生三若餘閣之奠是也事亾如事存若齊必具其所祭者是也記曰入門弗見也上堂又弗見也入室又弗見也亾矣喪矣蓋死而後亾也始死則事之如生旣亾則事之如存著存不怱乎心孝之至也

郊社之禮所以事上帝也宗廟之禮所以祀乎其先也

明乎郊社之禮禘嘗之義治國其如示諸掌乎

游氏曰惟聖人爲能饗帝爲其盡人道而與帝同德  
孝子爲能饗親爲其盡子道而與親同心也仁孝之  
至通於神明而神祇祖考安樂之其於慶賞刑威乎  
何有

仁者人也親親爲大

以上學庸

夫仁人也人無所不愛五達道皆當以仁矣親親何  
獨爲大蓋親者身之所自出罔極之恩也良心之發  
於此最爲真切五倫皆自此而推之也

未有仁而遺其親者也未有義而後其君者也

雲峰胡氏曰人性有五仁義爲先人倫有五君親爲先所以孟子揭此於七篇之首

孟子曰事孰爲大事親爲大守孰爲大守身爲大不失其身而能事其親者吾聞之矣失其身而能事其親者吾未聞之也

吳因之曰謂之能事其親還有許多順親於道底事不是一守身便了却事親但事親緊關處全在守身一着故歸重不失其身上

孰不爲事事親事之本也孰不爲守守身守之本也

新安陳氏曰事之本守之本照應章首四句分二者平說惟其爲本所以見其爲大

曾子養曾皙必有酒肉將徹必請所與問有餘必曰有曾皙死曾元養曾子必有酒肉將徹不請所與問有餘曰以矣將以復進也此所謂養口體者也若曾子則可謂養志也事親若曾子者可也

慶源輔氏曰養父母之口體者其事淺承順父母之心志者其思深夫子之於父異體同氣至親至密故

事之者當先意承志必能聽於無聲視於無形然後  
爲至若必待其言而後從固已不可況於先立其意  
以拂其親之欲唯口體是養而不恤其心志之虧乎  
蔡虛齋曰人子養志其目最多其體最大酒食一端  
特舉以見例耳如曾子之戰戰兢兢仁以爲已任死  
而後已皆養志之事也故曰將爲善思貽父母令名  
必果視於無形聽於無聲一跬步而不敢忘孝也  
孟子曰仁之實事親是也義之實從兄是也

新安陳氏曰洙泗言仁孟氏每言仁義言仁渾淪言



之言其理一者也故總言孝弟以明親親見親親爲  
仁民愛物之本也言仁義分別言之言理一中之分  
殊者也故以事親爲仁之實從兄爲義之實也集註  
謂有子之意亦猶此者蓋以本立於孝弟而仁道自  
此而生與仁義之實盡於事親從兄而仁義之道其  
華采亦皆自此而生此意有相似者耳

智之實知斯二者弗去是也禮之實節文斯二者是也  
樂之實樂斯二者樂則生矣生則惡可已惡可已則不  
知足之蹈之手之舞之

慶源輔氏曰知既明則自然弗去如人知水火之不可陷則自然不陷也人既知親之當愛兄之當敬孰肯舍其親而不愛舍其兄而不敬者其有不愛不敬者蓋其智爲物昏而知之不明非智矣事親自有事親之節文從兄亦然粗言之如溫清定省徐行後長之類各有品節文理便是禮之實不知手舞足蹈此聖人之作樂所以必有舞也樂之之意至於充盛之極則不假言說心意自然形見血脉自然流盪手舞足蹈皆自然而然不待心使之然故不自知也

孟子曰天下大悅而將歸已視天下悅而歸已猶艸芥也惟舜爲然不得乎親不可以爲人不順乎親不可以爲子

雙峰饒氏曰順親者父母所爲合乎道子所爲亦合乎道彼此無違逆之謂非順從之順也問如何可以諭之於道曰所謂先意承志諭父母於道父母之意未發我便做道理承順其志而諭之於道爲人子不特得父母之心又能諭父母於道方謂之孝

舜盡事親之道而瞽瞍底豫瞽瞍底豫而天下化瞽瞍

底豫而天下之爲父子者定此之謂大孝

西山真氏曰舜所值者至難事之親也然積誠感動不以父母爲不是而自引以爲已之愚惟見自己之不是而已世縱有難事之親豈得有如瞽瞍者故瞽瞍底豫而天下之爲人子者皆知無不可孝之親惟思爲子者未盡事親之道耳孰有不勉於爲孝者哉是故罪已而不非其親者仁人孝子之心也怨親而不反諸已者亂臣賊子之志也後之或遇難事之親者其必以舜爲法

人悅之好色富貴無足以解憂者惟順於父母可以解憂

慶源輔氏曰舉天下之所欲不足以解憂者所性不存焉故也惟順於父母可以解憂者性之不可離而亦不可以不盡也

大孝終身慕父母五十而慕者予於大舜見之矣

以上孟子

西山真氏曰五十始衰聖人純孝之心則不以老而

衰惟充極其天性之至孝而無一毫之不盡所以能

如此

陳氏曰常人變於私情所以汨其性聖人無私情之累所以盡其性孟子言此是亦遣人欲擴天理

伯禽與康叔朝於成王見乎周公三見而三笞之康叔有駭色謂伯禽曰有商子者賢人也與子見之乃見商子而問焉商子曰南山之陽有木焉名喬北山之陰有木焉名梓盍往觀焉於是二子如其言往觀之見喬寔高高然而仰梓寔晉晉焉而俯反以告商子商子曰喬者父道也梓者子道也二子明日見周公入門而趨登堂而跪周公拂其首勞而食之曰汝安見君子乎二子

以寔對公曰君子哉商子也

尚書大傳

曾子曰往而不可返者親也故子欲養而親不逮是故  
椎牛而祭不如鷄豚之逮親存也初吾爲吏祿不及釜  
尚欣欣而喜者非以爲多也樂其逮親也旣沒之後吾  
嘗南遊於楚得尊官焉堂高九尺車嘗百乘然猶北嚮  
而泣涕者非爲賤也悲不逮吾親也

子路曰有人焉夙興夜寐以事其親而無孝子之名者  
何也孔子曰意者身未敬耶色不順耶辭不遜耶無此  
三者何爲無孝子之名意者所友非仁人耶坐吾語汝

雖有國士之力不能自舉其身非無力也勢不便也是以君子入則篤孝出則友賢

以上韓詩外傳

孔子曰君子有三恕有君不能事有臣而求其使非恕也有親不能孝有子而求其報非恕也有兄不能敬有弟而求其順非恕也士能明於三恕之本則可謂端身子路見孔子曰負重涉遠不擇地而休家貧親老不擇祿而仕

孔子曰春秋祭祀以別親疎教民反古復始不敢怠其所由生也昔者文王之祭也事死如事生思死而不欲



生忌日賜必哀稱諱則如見親祀之忠也詩云明發不寐有懷二人敬而致之又從而思之孝子之情也文王惟能得之矣

孔子曰不孝者生於不仁喪祭之禮所以教仁愛也喪祭之禮明則民孝矣故雖有不孝之獄而無陷刑之民孔子適齊遇異人焉哭音甚哀孔子下車而問之對曰吾丘吾子也爾葡三失晚而自覺悔之何及孔子曰三失可得聞乎丘吾子曰吾少時好遊歷徧天下後還喪吾親是一失也畏事齊君君驕奢失士臣節不遂是二

失也吾生平厚交而今皆離絕是三失也夫樹欲靜而風不停子欲養而親不逮遂而不來者年也不可再見者親也請從此辭遂投水而死子曰小子識之斯足爲戒矣自是弟子辭歸養親者十有三

以上家語

爲人子者無以有已爲人臣者無以有已

老子

周有申喜者亡其母聞乞人歌於門下而悲之動於顏色與之語蓋其母也故父母之於子也子之於父母也一體而兩分同氣而異息若艸莽之有華寔也若樹木之有根心也雖異處而相通隱志相及痛疾相救憂思

孝經內傳

寶田山莊

相感生則相歡死則相哀此之謂骨肉之親神出於忠而應乎心而精相得豈待言哉管子

仲尼曰天下有大戒二其一命也其一義也子之愛親命也不可解於心臣之事君義也無適而非君也無所逃於天地之間是之謂大戒是以夫事其親者不擇地而安之孝之至也夫事其君者不擇地而安之忠之至也自事其心者哀樂不易施乎前知其不可奈何而安之若命德之至也莊子

孔子至於勝母暮矣而不宿過於盜泉渴矣而不飲惡

具名也尸子

堯問於舜曰人情何如舜對曰妻子具而孝衰於親嗜  
欲得而信衰於友爵祿盈而忠衰於君人之情乎人之  
情乎甚不美又何問焉惟賢者爲不然荀子

孝感天地應乎神明天子孝龜龍負圖庶民孝艸木榮  
茂皆曾子孝父母身體髮膚不敢毀傷至於終身跬步  
之間不忘孝道是以一切禽獸艸木取之以時不違天  
道竭力盡忠此爲孝子之志也素履子

凡爲天下治國家必務本而後末務本莫貴於孝人主

孝則名章榮下服聽天下譽人臣孝則事君忠處官廉  
臨難死士民孝則耕耘疾守戰固不罷北夫孝三皇五  
帝之本務而萬事之紀也夫執一術而百善至百邪去  
天下從者其惟孝也

呂覽

孝者善事父母之名也夫善事父母敬順爲本意以承  
之順承顏色無所不至發一言舉一意不敢怠父母營  
一手措一足不敢怠父母事君不敢怠忠朋友不敢不  
信臨下不敢不敬嚮善不敢不勤雖居獨室之中亦不  
不敢懈其誠此之謂全孝故至誠之道通乎神明光於

四海有感必應善事父母之所致也

亢倉子

老者非帛不煖非肉不飽今歲首不時使人存問長老  
又無衣帛酒肉之賜將何以佐天下子孫孝養其親今  
聞吏稟當受鬻者或以陳粟豈稱養老之意哉具爲令

漢文帝  
養老詔

古之立教鄉里以齒朝廷以爵扶世導民莫善於惠然  
則於鄉里先耆艾奉高年古之道也今天下孝子順孫  
願自竭盡以承其親外迫公事內乏資財是以孝心闕  
焉朕甚哀之民年九十以上有受鬻法爲復子若孫令

得身帥妻妾遂其供養之事

漢武帝養老詔

導民以孝則天下順今百姓或遭衰經凶災而吏繇事使不得塋傷孝子之心朕甚憐之自今諸有大父母父

母喪者勿繇事使得收歛送終盡其子道

漢宣帝遭喪勿繇詔

臣聞之孝經始於愛親終於哀戚上自天子下至庶人其義一也夫父母於子同氣異息一體而分三年乃免於懷抱先聖緣人情而著其節制服二十五月是以春秋臣有大喪君三年不呼其門閔子雖要經服從事以是公難退而致位以究私恩周室陵遲禮制不序蓼莪

老人作詩自傷曰瓶之罄矣維壘之耻言已不得終竟  
于道者亦上之耻也高祖受命蕭何創制大里有無告  
之科舍於致愛之義建武之初新承大亂凡諸國政多  
趨簡易大臣既不得告寧而郡司營祿念私鮮循三年  
之喪以報顧復之恩者禮義之方實爲凋損大漢之興  
雖承衰敝而先王之制稍以施行故籍田之耕起於孝  
文孝廉之貢發於孝武郊祀之禮定於元成三雍之序  
備於顯宗大臣終喪成於陛下聖功美業靡以尚茲孟  
子有言老吾老以及人之老幼吾幼以及人之幼天下



可運於掌臣願陛下登高北望以甘陵之思揆度臣子  
志心則海內咸得其所

陳忠論喪服疏

漢章帝欲封爵舅馬太后不許曰夫至孝之行安親  
爲上今數遭變異穀價數倍憂惶晝夜不安坐臥而慙  
先營外家之封違慈母之拳拳乎若陰陽調和邊境清  
靜然後行子之志吾但當含飴弄孫不能復關政矣漢紀  
臣聞之師曰漢爲火惠火生於木木盛於火故其惠爲  
孝其象在周易之離火在地爲火在天爲日在天者用  
其精在地者用其形夏則火旺其精在天溫煖之氣養

生百木是其孝也冬時則廢其形在地酷烈之氣焚燒山林是其不孝也故漢制使天下誦孝經選吏舉孝廉夫親喪自盡孝之終也今之公卿及二千石三年之喪不得卽去殆非所以增崇孝道而克稱火惠者也建者孝友勞謙行過乎儉故有遺詔以日易月此當時之宜不可以之貫萬世古人之制雖有損益而諒闇之禮未嘗改移以示天下莫遺其親今公卿羣僚皆政教所瞻而父母之喪不得奔赴傳曰喪祭之禮闕則人臣之恩薄焉背死忘生者衆矣曾子曰人未有自致者也必也

親喪乎昔翟方進自以備宰相而不敢踰制至遭母憂  
三十六日而除夫失禮之源自上而始古者大喪三年  
不呼其門所以崇國厚俗篤化之道也天下通喪可如  
舊禮

荀爽對策

荀悅曰王者必父事三老以示天下所以明有孝也無  
父猶設三老之禮況其存者乎孝莫大於嚴父故后稷  
配天尊之至也禹不先鯀湯不先契文王不先不畱古  
之道子尊不加於父母

漢紀

章帝詔議貢舉汝大鴻臚肅彪議曰夫國以簡賢爲務

賢以孝行爲首是以求忠臣必出於孝子之門忠孝之人持心近厚鍛鍊之吏持心近薄士宜以才行爲先不可純以閭閻其要歸在於選二千石二千石賢則貢舉皆得其人矣帝納之

人之行莫大於孝孝行成於內而嘉號布於外是謂建之於本而榮華自茂矣君以臣爲本臣以君爲本父以子爲本子以父爲本棄其本者榮華槁矣

劉向

善養者不必芻豢也善供服者不必錦繡也以已之所有盡事其親孝之至也故匹夫勤勞猶足以順禮啜菽

飲水足以致其敬故上孝養志其次養色其次養體易  
曰東鄰殺牛不如西鄰之禴祀也故富貴而無禮不如  
貧賤一孝悌閨門之內盡孝焉閨門之外盡悌焉朋友  
之道盡信焉三者孝之至也居家理者非謂積財也事  
親孝者非謂鮮殺也亦和顏色承意旨盡禮義而已矣

桓  
寬

孝莫大於寧親寧親莫大於寧神寧神莫大於四表之  
歡心

孝至矣一言而該聖人不加焉父母子之天地歟無天

何生無地何形

事父母自知不足者其舜乎不可得而久者事親之謂也故孝子愛日

以上楊子

馬融曰孝者必貴於忠忠苟不行所率猶非其道是以忠不及之而失其守匪爲危身辱及親也故君子行其孝必先以忠竭其忠則福祿至矣故得盡愛敬之心以養其親施及於人此之謂保孝行也

忠經

爲子之道莫大於寶身全行以顯父母此三者人不其善而或危身破家陷於滅亾之禍者何也由所習非其

道也夫孝敬仁義百行之首立身之本也孝敬則宗族  
安之仁義則鄉黨重之此行成於內名著於外矣

王昶

晉武帝居喪一遵古禮既葬有司請除衰服詔曰受終  
身之愛而無數年之報情所不忍也有司固請詔曰患  
在不能篤孝勿以毀傷爲憂前代禮典質文不同何必  
限以近制使達喪闕然乎羣臣請不已乃許之然猶素  
服以終三年

晉書

孔子曰夫孝莫大於嚴父嚴父莫大於配天則周公其  
人也子路曰傷哉貧也生無以養死無以葬子曰啜菽

飲水孝也夫鐘鼓非樂云之本而器不可去三牲非致  
孝之主而養不可廢存器而亾本樂之遁也調器以和  
聲樂之成也崇養以傷行孝之累也修己以致祿養之  
大也故言能大養則周公之祀致四海之祭言以義養  
則仲由之菽甘於東鄰之牲夫患水菽之薄干祿以求  
養者是以耻祿親也存誠以盡行孝積而祿厚者此能  
以義養也

范曄

臣嬰生不幸弱冠而孤母子零丁兄弟相長謹身爲養  
仕不擇官宦成梁朝命存亂世冒危履險自死輕生妻



息誅夷昆季冥滅餘臣母子得逢興運臣母妾劉今年八十有一臣叔母妾丘七十有五臣門弟姪故自無人妾丘兒孫又久凶泯兩家侍養惟臣一人前帝知臣之孤獎養臣以州里不欲使頓居艸萊又復矜臣溫清所以一年之內再三休沐臣之屢披丹款頻冒宸鑒非敢苟違朝廷遠離畿輦一者以年將六十湯火居心每跪讀家書前懼後喜溫枕扇席無復成童二者職居彝憲邦之司直若自虧身體何問國章前惠綢繆始許哀放內侍近臣多悉此旨正以選賢與能廣求明哲趙趙在

苒未始取才而上玄降戾奄至今日德音在耳墳土遽  
乾悠悠昊天哀此罔極兼臣私心煎切彌迫近時懷懷  
之所轉念塵觸伏惟陛下睿哲聰明嗣與下武刑於四  
海弘此孝治寸管求天仰歸惟戾有感必應實望聖明  
特乞霈然申其私禮則王者之德覃及無方矧彼翔沈  
孰非涵養

沈炯請歸養表

近啟歸訴庶諒窮款奉被還旨未垂哀察悼心失圖泣  
血待旦昉於品庶示均鎔造千祿祈榮更爲自援勵教  
廢禮豈關視聽所不忍言具陳茲啟昉從末宦祿不

代耕饑寒無甘旨之資限役廢晨昏之半膝下之歡已  
同過隙几筵之慕幾何可憑且奠醑不親如在安寄晨  
暮寂寥聞若無主所守既無別理窮咽豈及多喻明公  
功格區宇感通有塗若霈然降臨賜寢嚴命是知孝治  
所被爰至無心錫類所及匪徒教義不任崩殂之情謹  
以啟事陳聞

任昉上蕭太傅啟

北魏文成帝時高允好切諫事有不便允輒求見屏人  
極論魏主謂羣臣曰君父一也父有過子何不作書於  
衆中諫之而於私室屏處諫者豈非不欲其父之惡彰

於外耶至於事君何獨不然如高允者乃真忠臣也乎  
有過未嘗不直言朕聞其過而天下不知可不謂忠乎  
魏以房景伯爲清河太守其母崔氏通經有明識貝丘  
婦人列其子不孝景伯白其母母曰民未知禮義何足  
深責乃召其母與之對榻共食使其子侍立堂下觀景  
伯供食未旬日悔過求還崔氏曰此雖面慙其心未也  
且置之凡二十餘日其子叩頭流血母涕泣請還然後  
聽之卒以孝聞

以上南北史

隋上柱國鄭譯與母別居爲憲司所核除名文帝下詔

曰譯若畱之於世在人爲不道之臣戮之於朝入地爲  
不孝之鬼宜賜以孝經令其熟讀仍遣與母共居

隋書

蘇威嘗言於隋主曰臣先人每戒臣云唯讀孝經一卷  
足以立身治國何用多爲

隋書

人子之身非人子有也父母之體之分也雖曰異形實

一身也

龍門子

朕聞上古之風樸畧雖因心之孝已萌而資敬之禮猶  
簡及乎仁義既有親譽益著聖人知孝之可以教人也  
故因嚴以教敬因親以教愛於是以順移忠之道昭矣

立身揚名之義彰矣子曰吾志在春秋行在孝經是  
孝者德之本歟經曰昔者明王之以孝理天下也不敢  
遺小國之臣而況於公侯伯子男乎朕嘗三復斯言景  
行先哲雖無德教加於百姓庶幾廣愛刑於四海嗟乎  
夫子沒而微言絕異端起而大義乖況泯絕於秦得之  
者皆煨燼之末濫觴於漢傳之者皆糟粕之餘故魯史  
春秋學開五傳國風雅頌分爲四詩去聖愈遠源流益  
別近觀孝經舊註踏駁尤甚至於跡相祖述殆且百家  
業擅脩門猶將十室希升堂者必自開戶牖攀逸駕者

必騁殊軌轍是以道隱小成言隱浮僞且傳以通經爲義義以必當爲主至當歸一精義無二安得不剪其繁蕪而撮其樞要也常昭王肅先儒之領袖虞翻劉邵抑又次焉劉炫明安國之本陸澄譏康成之註在理或當何必求人故特舉六家之異同會五經之旨趣約文敷暢義則昭然分註錯經理亦條貫寫之琬琰庶有補於將來且夫子談經志取垂訓雖五孝之用則別而百行之源不殊是以一章之中凡有數句一句之內意有兼明具載則文繁畧之又義闕今存於疏用廣發揮

唐明  
皇孝

唐太宗嘗謂長孫無忌等曰今日吾生日世俗皆爲樂  
在朕翻成傷感今君臨天下富有四海而承歡膝下永  
不可得此子路所以有負米之恨也詩云哀哀父母生  
我劬勞奈何劬勞之日更爲宴樂乎因泣數行下左右  
皆悲

太宗將幸九成宮避暑監察御史馬周上疏曰大安宮  
在城西制度卑小而車駕獨爲避暑之行是太上皇留  
暑中而陛下居涼處也且太上皇春秋已高宜朝夕視



膳今去三百餘里或時思念陛下陛下何以赴之願速示返期以解衆姓之惑上深納之

臣伏奉今月二十二日勅受臣使持節都督容州諸軍事守容州刺史中丞充本管經畧守提使臣聞孝於家者忠於國以事君者無所隱臣有至切不敢不言臣實一身奉養老母醫藥飲食非臣不喜臣暫遠離則憂悸成疾臣又多疾近日加劇前在道州匍匐六歲實無政理多是假名頻請停官使司不許今臣所屬之州陷賊歲久頽城古木遠在炎荒管內諸州多行賓伏行營野

次向十餘年在臣一身爲國展效死當不避敢憚艱危  
但以老母念臣疾疹日久時方大暑南逾火山舉家漂  
泊寄在湖上單車將命越於賊庭臣將就路老母悲泣  
聞者悽悽臣心可知臣欲扶持版輿南之合浦則老母  
氣力難於遠行臣欲奮不顧家則母子之情禽畜猶有  
臣欲久辭老母則又汚辱名教臣欲便不之官又恐稽  
違詔命在臣肝腸如煎如燭昔徐庶心亂先主不逼令  
伯陳情晉武允許君臣國家萬代爲規伏惟陛下以孝  
理萬姓慈育生類在臣情志實堪矜愍臣每讀前史見

吳起遊宦噬臍不歸溫嶠奉使絕裾而去嘗恨不逢斯人使之殊死臣所以冒犯聖旨乞停今授待罪私門長得奉養供給并稅臣之懇願塵黷天威不勝惶恐謹遣某官奉表陳讓以聞

元結辭容州表

蘇頲遭父喪肅宗起復爲侍郎頲固辭上使李日知諭旨日知終坐不言而還奏曰臣見其哀不忍言恐其殞絕上乃聽其終制

唐憲宗卽位王叔文之黨皆爲遠州刺史柳宗元得柳州劉禹錫得播州宗元曰播州非人所居而夢得親在

堂萬無母子俱送理欲請於朝以柳易播裴度亦以母老爲言上曰爲人子者不自謹貽親憂此則重可責也度曰陛下方侍太后恐禹錫在所宜矜上謂左右曰裴度愛我忠切禹錫得改連州

張士衡講教鄉里太宗擢爲崇賢館學士太子承乾嘗問事佛對曰事佛在清淨仁恕如君仁臣忠子孝則福祚反是而殃禍至

陽城爲國子司業引諸生告之曰凡學者所以學爲忠與孝也諸生有久不省親者乎明日謁城還養者二十

章有三年不歸侍者斥之

以上唐書

天子孝曰就就之爲言成也天子德被天下澤及萬物  
始終成就則其親獲安故曰就也諸侯孝曰度度者  
也諸侯居國能奉天子法度得不危溢則其親獲安故  
曰度也卿大夫孝曰譽譽之爲言名也卿大夫言行布  
滿能無惡稱譽達遐邇則其親獲安故曰譽也士孝曰  
究究者以明審爲義士始升朝辭親入仕能審資父事  
君之道則其親獲安故曰究也庶人孝曰畜畜者含畜  
爲義庶人含情受朴躬耕力作以畜其德則其親獲安

故曰畜也

舊唐書

訪聞喪葬之家有舉樂及令章者蓋聞鄰里之內喪不相舂苴麻之旁食未嘗飽此聖王教化之道治世不刊之言何乃匪人親罹曩酷或則舉奠之際歌吹爲娛靈柩之前令章爲戲甚傷風教實紊人倫今後有犯此者並以不孝論預坐人等第科斷所在官吏常加覺察如不用心並當連坐

宋太宗禁喪葬舉樂詔

英宗卽位疾甚遇宦者尤少恩左右讒間兩宮內外洵懼一日韓琦歐陽修奏事太后嗚咽流涕具道所以琦

曰病已必不然子疾母可不容之乎修進曰昔溫成之寵太后處之裕如今母子間反不能容耶后意稍和琦進曰臣等在外聖躬若失調護太后不得辭其責后驚曰是何言我心更切也後數日琦獨見帝帝曰太后待我少恩琦對曰自古聖帝明王不爲少矣獨稱舜爲大孝豈其餘盡不孝哉父母慈而子孝此常事不足道惟父母不慈而子不失孝乃爲可稱但恐陛下事之未至耳父母豈有不慈者哉帝大感悟

張守告高宗曰陛下處宮室之安則思二帝母后穹廬

毳幕之居享膳膳之奉則思二帝母后膾肉酪漿之味  
服細煖之衣則思二帝母后窮邊絕塞之寒苦操弓奪  
之柄則思二帝母后語言動作受制於人享嬪御之適  
則思二帝母后誰爲之使令對臣下之朝則思二帝母  
后誰爲之尊禮思之又思兢兢業業聖心不倦而天不  
爲之順助者萬無是理也 以上宋史

凡子受父母之命必籍記而佩之時習而速行之事畢  
則返命焉或有不可行則和色柔聲具是非利害而白  
之苟於事無大害者亦當曲從 司馬溫公



張子西銘曰乾稱父坤稱母予茲藐焉乃混然中處故  
天地之塞吾其體天地之帥吾其性民吾同胞物吾與  
也大君者吾父母宗子其大臣宗子之家相也尊高年  
所以長其長慈孤弱所以幼其幼聖其合德賢其秀也  
凡天下疲癯殘疾孺獨鰥寡皆吾兄弟之顛連而無告  
者也於是保之子之翼也樂且不憂純乎孝者也違曰  
悖德害仁曰賊濟惡者不才其踐形惟肖者也知化則  
善述其事窮神則善繼其志不愧屋漏爲無忝存心養  
性爲匪懈惡旨酒崇伯子之顧養育英才穎封人之錫

類不弛勞而底豫舜其功也無所逃而待烹申生其恭也體其受而歸全者參乎勇於從而順令者伯奇也富貴福澤將厚吾之生也貧賤憂戚庸玉女於成也存吾順事沒吾寧也

晦庵朱子曰天地之間理一而已而乾道成男坤道成女二氣交感化生萬物則其大小之分親疎之等至於十百千萬而不能齊也不有聖賢者出孰能合其異而反其同哉西銘之作意蓋如此程子以爲明理一而分殊可謂一言以蔽之矣蓋以乾爲父以坤

爲母有生之類無物不然所謂理一也而人物之生  
血脉之屬各親其親各子其子則其分亦異得而不  
殊哉一統而萬殊則雖天下一家中國一人而不流  
於兼愛之蔽萬殊而一貫則雖親疎異情貴賤異等  
而不枯於爲我之私此西銘之大旨也又曰人之  
身固是父母所生然父母之所以爲父母者卽是乾  
坤若以父母而言則一物各一父母若以乾坤而言  
則萬物同一父母矣古之君子惟是見道理真實如  
此所以親親而仁民仁民而愛物推其所爲以至於

能以天下爲一家中國爲一人而非意之也

雙峰饒氏仲元曰西銘一書規模弘大而條理精密  
有非片言之所能盡然其大指不過中分爲兩節前  
一節明人爲天地之子後一節言人事天地當如子  
之事父母何謂人爲天地之子蓋人受天地之氣以  
生而有是性猶子受父母之氣以生而有是身父母  
之氣卽天地之氣也分而言之各一父母也合而  
言之舉天下同一父母也人知父母之爲父母而不  
知天地之爲大父母故以人而視天地常漠然與已

如不相關人於天地既漠然如不相關則其所存所  
發宜乎無適而非已私而欲其順天理遏人欲以全  
天地賦予之本然亦難矣此西銘之作所以首因人  
之良知而推廣之言天以至健而始萬物則父之道  
也地以至順而成萬物則母之道也吾以藐然之身  
生於其間稟天地之氣以爲形而懷天地之理以爲  
性豈辨予之道乎其下繼之以民吾同胞物吾黨與  
而同胞之中復推大君者爲宗子大臣者爲宗子之  
家耋高年者爲兄孤弱者爲弟聖者爲兄弟之合總

乎父母賢者爲兄弟之秀出乎等夷疲癯殘疾卑獨  
鰥寡者爲兄弟之顛連而無告者則皆所以著夫並  
生天地之間而與我同類者雖有貴賤貧富長幼賢  
愚之不齊而均之爲天地之子也知並生天地之間  
而與我同類者均之爲天地之子則天地爲吾之父  
母也豈不昭昭矣乎故曰前一節明人爲天地之子  
何謂人事天地當如子之事父母蓋子受父母之氣  
以生則子之身卽父母之身人受天地之氣以生則  
人之性亦卽天地之性子之身卽父母之身故事親

者不可不知所以保愛其身人之性卽天地之性則  
事天者亦豈可不知所以保養其性耶此西銘之作  
所以旣明人爲天地之子而復因事親之孝以明事  
天之道也樂天者不思不勉而順行乎此性猶人子  
愛親之純而能愛其身者也畏天者戰戰兢兢以保  
持乎此性猶人子敬親之至而能敬其身者也若夫  
徇私以違乎理縱欲以害其仁無能改於氣稟之惡  
而復增益之則是反此性而爲天地悖德賊親不才  
之子矣盡此性而能踐其形者其惟天地克肖之子

乎窮神知化樂天踐形者之事也存心養性而不愧  
屋漏畏天以求踐乎形者之事也以此修身則爲顧  
養以此及人則爲錫類以此處常而盡其道則爲底  
豫爲歸全以此處變而不失其道則爲待烹爲顧令  
愛惡逆順處之若一生順死安兩無所憾事親而至  
於是則可以爲孝子事天而至於是豈不可以爲仁  
人乎故曰後一節言人之事天地當如子之事父母  
此篇之指大畧如此朱夫子所謂推親親之厚以大  
無我之公因事親之誠以明事天之道亦此意也鳴



呼繼志述事孝子之所以事親也存心養性君子之  
所以事天也事親事天雖若兩事然事親者卽所以  
爲事天之推而善事天者乃所以爲善事其親者也  
臨川吳氏艸廬曰天地者吾之父母也父母者吾之  
天地也天卽父父卽天地卽母母卽地人事天地當  
如事父母子事父母當如事天地保者持守此理而  
不敢違賢人也樂者從容順理而自然中聖人也蓋  
是理卽天地之理而天地卽吾之父母也持守而不  
敢違吾父母之理非子之翼敬者乎從容而自然順

吾父母之理非孝之極純者乎不愛其親而愛他人者謂之悖德天理者父母所以與我者也而乃違之是不愛其親也賊仁者謂之賊仁者父母所以與我之心德也而乃害之是戕其親也世濟其惡增其惡名則是父母之不才子矣若能踐其所以得五行秀爲萬物靈者之形則是與天地相似而克肖乎父母矣知者聖人踐形惟肖有以默契乎是理非但見聞之知也化則天地化育之事乾道變化發育萬物各正性命者知得天地化育之事則吾亦能爲天地之

事是善述吾父母所爲之事矣窮者聖人窮理盡性有以究極乎是理而知之無不盡也神則天地神妙之心純天之命至誠無息於穆不已者窮得天地神妙之心則吾亦能心天地之心是善繼吾父母所存之志矣此造聖之終事踐形惟肖者之盛德所謂樂且不憂純乎孝者也不愧屋漏者已私克盡心自然存性得其養雖於屋漏之與尚無愧怍之事夫其無愧於天則是無忝辱所生之父母也存心養性者用力克已惕然惟恐有愧於天操而不舍其主於身之

心順而不害其具於心之理存心養性所以事天夫其不怠於存養此天理則是不懈怠於事父母也此作聖之始事學踐形惟肖者之工夫所謂於時保之子之翼也然知化者必能窮神窮神然後能知化不愧屋漏者必能存心養性存心養性然後能不愧屋漏善述事者必能繼志善繼志者然後能述事無忝者必能匪懈匪懈然後能無忝存心養性然後有以不愧屋漏不愧屋漏然後可以至於窮神窮神然後有以知化匪懈然後有以無忝無忝然後可以至於

善繼志善繼志者然後可以善述事也

榮陽呂氏原明曰孝子事親須事事躬親不可委之使令也嘗觀穀梁言天子親耕以供粢盛王后親蠶以供祭服國非無良農工女也以爲人之所盡事其祖禰不若以已所自親者也此說最盡事親之道又說爲人子者視於無形聽於無聲未嘗頃刻離親也事親如天頃刻離親則有時而違天天不可得而違也

魯齋許氏平仲曰事親大節目是養體養志致愛致敬四事中致愛敬尤急所以孝只是愛親敬親兩事耳天

子之孝推愛敬之心以及天下亦惟此二事爲能刑於四海固結人心舍此則法術矣其效與聖人不相似父母在不遠遊爲人子者恃血氣何所不違但父母思念之心宜深體當以父母之心爲心

朱子曰人之所以有此身者受形於母而資始於父雖有強暴之人見子則憐至於襁褓之兒見父則笑果何爲而然哉初無所爲而然此父子之道所以爲天性而不可解也然父子之間或有不盡其道者是豈爲父而天性有不足於慈亦豈爲子而天性有不足於孝者哉

人心本明天理素具但爲物欲所昏利害所蔽故小則傷恩害義而不可開大則滅天亂倫而不可以救也

勉齋黃氏直卿曰古人奉先追遠之誼至重生而盡孝則此身此心無一念不在其親及親之沒也升屋而號設重以祭則祖考之精神魂魄亦不至於遽散朝夕之奠悲慕之情自有相爲感通而不離及其歲月既遠若未易格則祖考之氣雖散而所以爲祖考之氣未嘗不流行於天地之間祖考之精神雖亾而吾所受之精神卽祖考之精神以吾受祖考之精神而交於所以爲祖

考之氣神氣交感則洋洋然在其上在其左右者蓋有  
必然而不能無者矣學者但知世間可言可見之理而  
稍幽冥難曉則一切以爲不可信是以其說卒不能合  
於聖賢之意也

以上性理

父母不近人情者惟舜爲然若中人之性其愛惡若無  
害理必姑順之若親所喜之故舊當竭力招致賓客之  
奉當極力營辦務以慰親之心不可計家之有無然又  
須使之不知其勉強勞苦苟使見其爲之不易則亦不  
安矣豈悅親之道乎

張橫渠



問閭小人得一食必先以食父母夫何故以父母之口  
重於己之口也得一衣必先以衣父母夫何故以父母  
之體重於己之體也至於犬馬亦然待父母之犬馬必  
異乎己之犬馬也

程伊川

孝爲百行之宗行純則性通行虧則性賊二者常因焉  
本同故也孝以敬爲本而敬者修性之門也自天子達  
於庶人孝之事雖不同同本於敬事親而不敬何以爲  
孝乎成百善哉千非惟此心而已敬心而發孝於其親  
矣推於兄弟恭而友者是其應也推於夫婦和而順者

是其應也推於親黨朋友恭而睦同而信者是其應也  
推於事君治人忠而恕廉而動者是其應也是數者不  
一應焉非孝也借曰孝焉敬心必不純也悔之支流必  
賊玉之棄屑必潤中存是心發無不應也是知孝子之  
心萬慮俱忘惟一敬念而已視如對日星聽如警雷霆  
食如盤誦銘寐如几宣箴坐如立記過之史行如隨糾  
非之吏不期肅而自肅焉念之所通無門無旁塞乎天  
地橫乎四海莫知其紀極也昔人有發塚而夢通齧指  
而心動者在其知覺中有如影響至於鬼神之秘禽鳥

之微艸木之無知皆可感格非譎異也自然也敬心既  
純大本發露虛明洞達躍如於兢兢肅肅之中此至孝  
之士所以行成於外而性修乎內也會子之孝立身揚  
名惟此一節而於聞道最爲超警死生之際粲然明白  
蓋由始則因孝心而致敬終則因敬心而成已驗其平  
日服膺念茲在茲而已啟手足則見於戰戰兢兢之時  
發善言則存乎容貌辭氣之際皆敬之謂也戴經所記  
與義甚多首文三語已盡其要學者非弗知也然皆有  
愧於曾子者行之弗至也恭於昭昭者孝之名也謹於

學者之實也求其名匹夫匹婦能焉核其實聖人  
以爲難矣曾子曰養可能也敬爲難敬可能也安爲難  
安可能也卒爲難斯須之敬人能勉強至於能安能卒  
非確然自信毅然必爲未有能樂其常而致其至也此  
無他疑情未除也學者之害疑情爲大彼窮搜博覽惟  
恐不聞者疑情未除也朝諮夕叩請益不休者疑情未  
除也博量揣摩求合乎似者疑情未除也情既有疑則  
中不安不安則輕聽而易移輕聽則不能尊其所聞易  
移則不能行其所知二者交亂其間方且以禮法爲拘

四耑精則滯著求其有始有卒難矣曾子遊聖門最爲  
年少夫子一與之言道唯諾而已夫豈有毫髮疑情哉  
宜其成就巍巍度越諸子矣

劉子翬曾子論

父母之於子全而生之者也所謂全者豈謂四肢百體  
之備而已有是形則有是性舉天下之善無不具焉自  
居處必莊以至於戰陳必勇皆善之目也一善不存則  
爲虧其性虧其性卽爲辱其親矣尚焉得爲孝乎然曾  
子於此必總之以敬之一辭者善具於性而主之者心  
是心常存然後能不失其性故敬則五者皆遂不敬則

五者皆失此曾子所以戰戰兢兢至於啟手足而後知  
免與

古之事親者不一曰違其親之側故凡間衣燠寒拂搔  
疴癢眠膳奉席之事皆躬爲之惟其從政也迫於王事  
則有行役之久而不得以養者故陟岵鵲羽諸詩幽憂  
憤嘆甚者呼天以自憊焉後世之士無王事之迫乃或  
浮游客寄或十年或五六年不一覲其親其說曰吾將  
有得而歸爲父母榮也吁事親之日有涯而外物去來  
不可必也

以上真西山

孝一也而分不齊故自天子至於庶人事親之心未始  
或殊惟隨分以自盡耳不可謂曾參布衣而其孝不足  
舜撫四極而其孝有餘夫曾子之貧可知矣固不以貧  
而自歎舜之富貴可知矣亦不以富貴而自足蓋愛親  
性也貧富貴賤命也君子盡性不謂命也又曰子不私  
於親非子也士不明於義非士也賢者審擇內外取舍  
之宜以事其親愛日之誠而無不及之悔在我而已致

黨

冀州之西二萬里有孝養之國其俗人年三百歲織

爲衣卽島夷卉服之類死塋之中野百鳥啣土爲墳  
獸爲之掘穴不封不樹有親死者刻木如影事之如生  
昔黃帝伐蚩尤除諸凶害獨表此爲孝養之鄉舜封爲  
孝養之國

王嘉籍遺記

金世宗時以所進御膳味不調適有旨問之尚食局直  
長言臣聞老母疾劇私心憤亂如喪魂魄以此有失常  
視臣罪萬死上嘉其孝卽令還家侍疾俟愈乃來

元平章政事廉希憲立朝謹正元世祖令受帝師僧八  
思馬戒希憲曰臣已受孔子戒世祖曰孔子亦有戒耶



對曰爲臣當忠爲子當孝孔子之戒如是而已

河北道廉訪副使僧家奴言自古求忠臣必於孝子之門今官於朝十年不省覲者有之非無思親之心實由朝廷無給假省親之制而有擅離官次之禁古律諸職官父母在三百里外三年聽一給寔省假二十日親不存者三年聽一給拜墓假十目宜計道里遠近定立假期其應省覲匪不行者坐以罪文宗詔廷臣議行之

元史

龍江衛吏以過罰書寫值母喪乞守制吏部詹徽不許

吏擊登聞鼓太祖切責徽曰吏雖罰役天倫不可廢母死不居喪人子之心終身有歉夫有善而阻之何以爲勸徽大慚吏得終喪

太祖行後苑見巢鵲翼哺之勞曰禽鳥且爾況人母子之恩乎令羣臣有親老者許歸養

明世宗詔曰人君爲治必本孝道聖人論政必先正名尊稱大禮屢命羣臣集議輒引漢定陶王宋漢王爲據朕心靡寧蓋漢宋二帝嘗立爲子朕則入奉宗祧與爲人後者不同劬勞之恩昊天罔極因心之孝每用歉然

今稱獻皇帝曰皇考皇太后曰聖母各正厥名以申朕  
惓惓孝養之誠

以上明史

孝子之愛親無所不至也生欲其壽凡可養生者皆盡  
心焉死欲其傳凡可以昭揚後世者復不敢忽焉養有  
不及謂之死其親沒而不傳道謂之物其親斯二者罪  
也物之尤罪也是以孝子修德修行以令聞加於祖考  
守職立功以顯號遺乎祖考俾久而不念遠而有允今  
之人不然豐於無用之費而嗇於顯親之禮以妄自誑  
而不以學自勉不孝莫大焉

方孝孺孝經解序

欲正大綱莫先於明人倫欲明人倫莫先於孝故先王  
制禮子有父母之喪君命三年不過其門所以教人孝  
也古者求忠臣於孝子之門誠以居家孝故忠可移於  
君爲人臣者未有不孝於親而能忠於君者也爲人君  
者未有不教其臣以孝而能得其臣之忠者也宋仁宗  
嘗以故事起復富弼矣弼之詞曰何必遵故事以遂前  
代之非但當擬禮經以行今日之是孝宗嘗以故事起  
復劉珙矣珙之詞曰身在艸廬之中國無門庭之寇難  
冒金革之名以私利祿之寔此無他君能教其臣以孝

臣有孝可移忠於君也自是而後史嵩之援例起復爲  
丞相王黻起復爲執政陳宐中起復爲宰相賈似道起  
復爲平章此無他君不教其臣以孝臣無孝而移忠其  
君者也陛下必欲賢任天下之事不揣門內之私則賢  
不可起口則可言使賢於天下之事知則必言言之則  
必盡陛下於賢之言聞之必欲行行之則必力則賢雖  
不起復猶起復也何必違先王之禮經拘先朝之故事  
損大臣之名節虧聖明之清化而後天下可治哉

羅倫  
論起

後李  
賢疏

父母之喪人子豈不欲一哭便死方快於心然却曰毀不滅性非聖人強制之也天理本體自有分限不可過也王陽明

教讀朱源見其先世所遺翰墨知其爲宋孝子壽昌之裔也旣獎爛矣使工爲裝緝之因諭之曰孝人之性也置之而塞乎天地溥之而橫乎四海施之後世而無朝夕保爾先世之翰墨則有時而獎保爾先世之孝無時而或獎也人孰無是孝豈保爾先世之孝保爾之孝耳保先世之翰墨亦保其孝之一事充是心而已矣源歸

其以吾言遍諭鄉鄰苟有慕壽昌之孝者各充其心焉  
皆壽昌也已

王陽明書朱孝子朱壽昌孫教讀原卷

李空同曰孝子之於親欲其修而無短故親之身非無  
嗣也孝子曰吾親如金石如松栢如彭如聃非不知人  
之身非六者倫也乃其心恆若斯矣故曰孝子愛日

呂涇野曰夫壽親有三道焉得其上者之謂聖得其中  
者之謂賢得其下者之謂才或曰何謂也曰壽其德者  
萬世有辭金石同其堅日月齊其明非聖而能之乎壽  
其齒者順厥考心身甚康強年越其度非賢而能之乎

壽其業者箕裘不壞爲他人有非才而能之乎故聖也者盡性者也賢也者盡情者也才也者盡力者也

汪南明曰人子亦爲其親用命耳親命之學則力學親命之田則力田藉令廢詩書棄稼穡雖日侍親側何以中親之歡

白沙子曰夫孝百行之源也通於神明究於四海堯舜大聖人也孟子稱之曰孝弟而已矣

以上明文

羅仲素論瞽瞍底豫而天下之爲父子者定云只爲天下無不是底父母魏了翁聞而善之曰惟如此而後天



下之爲父子者定彼臣弑君子弑父皆始於見其有不是處耳若一味見人不是則兄弟妻子朋友以及童僕鷄犬到處可憎終日落墮火中如何得出故云每事自反不獨天下之父子定而天下之兄弟妻子朋友童僕鷄犬亦無不定真一帖清涼散也

周萊峰問陸平泉云吳康齋謂三綱五常天下元氣一家亦然一身亦然此言何義平泉云古人有言天下雖亂亦有一方太平者一方雖亂亦有一家太平者如太舜父頑母嚚象傲烝烝乂不格奸是也卽此便是元氣

或問事親若會子者何義余曰此句真精神在大學如保赤子心誠求之上又問曰此又是何義余曰大約父母之於赤子無有一件不養志的人子報父母却只養口體此心何安卽如會子之養曾皙比之三家村老嫗養兒者十分中尚不及一所以僅稱得個可字今人不必遠法曾參但去取法三家村老嫗養兒自然事父母不敢在口體上塞責矣

古人事親惟恐不成聖賢今人事親惟恐不成科第是可謂養志乎曰父以此教之子以此成之如何不是養

志但旣得科第之後親老不能隨子十年五年常不相見卽錦衣歸省內有妻孥外有賓客出入匆匆其捧觴上壽開口而笑者又能有幾日甚則新莊故宅父子各居雖供養不缺而飲食寒溫滋味醎酸之類誰復爲之檢點此無論養志亦何曾叫得養口體市井負販父子兄弟團圓一處其饔飧無日不相共其痛癢無刻不相關卽口體之養未全而養志却無愧者且寸薪粒米皆從剗心瀝血中來如此養父母味雖苦而情則甘富貴家名曰祿養而未能必躬必親如此養父母味雖甘而

情則苦嗚呼爲人子者不惟不能養志抑且不能養口  
體非其忍心如此所謂終身由之而不知者耳雖然亦  
却被科第二字累他一半蓋父母教之而父母還以自  
累也

以上陳眉公私笈

父母於諸子中有獨貧者往往念之常加矜恤飲食衣  
服之類或有所私厚子之富者如有所奉則轉以與之  
此乃父母均一之心而子之富者或因以生怨殆未之  
思耳若使我貧彼富父母必移此心於我矣

日省錄

五刑莫大不孝王法誅之冥律禁之其特甚者則有四

等父母待孝尤切曰老曰病曰鰥寡曰貧乏父母當壯  
盛起居猶能自理至龍鍾鵠立扶杖易仆寒夜苦寂鐵  
骨難挨又如偏風久病坐臥不適遺洩叢穢蕭薦可憎  
子所難奉惟此時親所賴子亦惟此時又如老境失耦  
寒煖誰問丈夫猶可殘婦奈何就使兒孫滿前耦者耦  
稚者稚人人舛睡去箇箇樂事歸漏聲長處不可問枕  
邊淚濕與誰同有孝兒孫頗娛晚景不幸而母我者乘  
慣澈潑姑我者橫面阻絕祇護半點骨血空博一世淒  
涼又有撫字財匱婚娶力竭健少年經營肥煖老窮人

搔首躊躇望一味以垂涎丐三食而忍氣吁嗟身幾  
來而長養若是此數老冤氣猶足動天子孫倍當行孝  
勸化者於斯更喫緊云

不孝習成有四一曰私財財入吾手便爲吾有而在父  
母手者又謂吾得有之也財足則忘親財乏則覲親求  
財不得則怨親甚且以單父隻子而爭財囉咆者有矣  
少長互推而棄親不養者有矣不知身誰之身我不帶  
一財來而襁哺無缺以至今日誰爲者乎二曰戀妻子  
妻子習狎而父母嚴重也美味錢財欲娛妻寵子佳會

良辰欲擁妻抱子而寧親之念遂微也不思子爲我子而我爲誰子親念我不顧則我亦何賴有子哉夫妻故聚然當呱呱待哺時豈解戀妻卽妻能擁我生活耶辛勤字我指望有婦得稱成人代勞貽燕乃有婦而親反不得有子耶三曰嫖蕩慾火正熾客誘如狂有倚廬傷心者不解也家業浪費婦姑勃蹊有激聒誚讓者不辦也懷子不寐風雨淒長夜之魂垂白無歡菽水冷半生之奉吁嗟狂興幾何忍令有此四曰爭妒天地之大人猶有憾父母之於衆子也情豈無偏乃攘臂爭分側

曰奪寵或兄弟而觴觥或姊妹而計較護短爭長分曹  
伐異相讒壘而家道悞積嗔喜而孝情薄矣此四者人  
之常情人子不免其流遂至大不孝吁可惕哉

人子於親祭之厚不如養之薄俗每於歲節清明一詣  
墳所餘半載俱置親於荒墟不問祭時候大率與兄弟  
親友放情遊覽盡歡而歸節歲非掃松也祇賞梅耳清  
明非省墓也祇踏青耳嗟夫祿不及親飽妻孥而何益  
生虧菽水沒列鼎以何爲

顏伯子孝弟醒語云但念得身從何來父母從何違新



枝旣起舊本爲枯菽水承歡何能報答則孝心自然疼  
痛但念得茫茫大造出世幾時渺渺人寰同胞幾個勿  
相濡沫老共護持則友弟自然肫懇

唐王中書勸孝篇云世有不孝子浮生空碌碌不念父  
母恩何殊生枯木百骸未成人十月居母腹渴飲母之  
血饑食母之肉兒身將欲生母身如殺戮父爲母悲辛  
妻對夫啼哭惟恐生產時身爲鬼眷屬一旦見兒面一  
命喜再續自是慈母心日夜勤撫鞠母臥濕簾蓆兒眠  
乾裯褥兒睡正安穩母不敢伸縮潛身在臭穢不暇思

沐浴橫簪與倒冠形容不顧陋動步憂坑井舉足畏顛  
覆乳哺經三年汗血計幾斛辛苦萬千端年至十五六  
性氣漸剛強行止難拘束朋友外追遊酒色恣所欲日  
暮不歸家倚門至昏旭兒行千里程母心千里逐一娶  
得好妻魚水情和睦看母面如土觀妻顏似玉母若責  
一言含嗔怒雙目妻或罵百般陪笑不爲辱母披舊裙  
衫妻著新羅縠不避人憎嫌不解人羞忸父母或鰥寡  
長夜守孤獨健或與一飯病則與一粥棄置在空房猶  
如客寄宿將爲泉下鬼命若風中燭快快至無常孤魂

殞山谷魂靈在幽壤誰念纏絳梏纔得父母以兄弟分  
財祿不識二親恩惟言我之福咸謂此等人不如禽與  
畜慈烏尚反哺羔羊尤跪足勸汝爲人子經書勤覽讀  
黃香夏扇枕冬預溫衾褥王祥臥寒冰孟宗泣枯竹郭  
巨尚埋兒丁蘭曾刻木如何今時人不學古風俗勿以  
不孝頭枉戴人間屋勿以不孝身枉著人衣服勿以不  
孝口枉食人五穀天地雖廣大不容忤逆族蚤蚤悔前  
非莫待天誅戮

楊貞復論讀孝經曰每日清晨默坐閉目存想從自身

現今年歲回想孩提愛親時光景如何又逆想下胎一聲啼叫時光景如何又逆想在母腹中母呼亦呼母吸亦吸時光景如何到此情識俱忘只有綿綿一氣忽然自生歡喜然後將身想作個行孝的曾子侍立在孔子之側無限恭敬無限愛樂

不孝所以習成者有四一曰驕寵父母憐憫過甚嘗順他性驟拂之則不堪嘗讓他便宜任他佚豫令之執勞則不習出言稍有過失父不忍唐突子也子乃敢唐突其父文行藝能父譽子惟恐不在我上也子必欲父之

出我下積此驕妬他人處展不出手獨父母處展得出  
手遂真謂老成人無聞知矣二曰習慣語言麤率慣便  
敢衝突動作簡易慣便敢放恣父母分甘絕少慣遂不  
復憶其甘旨父母扶病任苦慣遂不復問其痛癢三曰  
樂縱見同輩不勝意氣對雙老而味薄入私室千般趣  
態昭高堂而機蜜甚且明以父子兄弟爲俗物者矣四  
曰忘恩記怨夫恩習愈忘怨習愈積人情然也故一飯  
見德習久則麀嘯起一施感恩普濟則多寡生一迎面  
見親累日則猜嫌重况父母兄弟生而習之以親愛爲

故常且有憂我而獲拂者卒有譽我而被  
者矣有強  
孫吾事而怒耽者矣眼前大憾惻然固職况能推及胎  
養之勞襁哺之苦弱質驚魂之痛者哉故人情有至顛  
倒而不自覺者子之於父母是也此數語皆近人情且  
其人未嘗無真性也積久不知其悞耳曷望急急喚醒  
蚤蚤克治時思冲下時念原本時時入親肺腑中其不  
爲大孝者鮮矣

以上出昨非庵